

Mak

Jon Naan Igunēdiya Tamo Naab Dodok Fenen

(Matyu 3:1-12; Luk 3:1-18; Jon 1:19-28)

¹ Jesus Kristus, Negur Naal nigin, biya od gariya inoya.

² Profet Asaia nē itotoya bun ibodok:

“Aya neu arū tamo ĩ ket sur afe di, ĩ uyu ilauf,

ogon naab dodok fouf.”*

³ “Ait taka gerere tuan iweig irok,

‘Odug nē naab dodok ge fen,

madur wenēg.’”†

⁴ Age fiya nigin, Jon isin, tamo kayau gerere tuan od irokenēdi di, waud falei del, nedi mosor yaleleya nigin naan igunēdin. ⁵ Judia kalilī fiya, Jerusalem tamo kayau ganan, ĩ garan dilen. Idi neid mosor kurō difesi di, idi im Jordan naanū naan igunēdin. ⁶ Jon kamel siwi nem gabar diwan anī ifonūdig. Agef fen, gaar gabar nem lū diwan anim luwa gu fedig. ĩ totobi nin te ado yōdig. ⁷ Eī enī yogon od iron, “Taka ĩ aya dumeun dō fiyauuf, anī ere, in megeir neu wal fiya. Aya to biya nigin, iborou bobou fe fen, in ye su nē malū biru fiya kisi feleya sā.‡ ⁸ Aya naan nem aguneik, anī ere, ĩ Awa Uur Fateulem iguneif.”

Jesus Naan Igun Ado ĩ Bun Kisi Fiya Wō Yen

(Matyu 3:13-4:11; Luk 3:21, 22; 4:1-13)

⁹ Sain anī bun, Jesus Nasaret taun oun Galili nediwom isi, Jonem Jordan naan igunen. ¹⁰ Jesus naanum fā yale fen, ĩ lof mog, saa tano kāf fen, Awa Uur kuburir gen, ĩ

* 1:2: Malakai 3:1 † 1:3: Asaia 40:3 ‡ 1:7: Juda neid tobonunā anī, sain tamo yana ado isi di, idi neid kabī tamo in ye su nē malū biru difedig.

bun isi mog, ilen. ¹¹ Age fe di, ait taka saa ilunem isin, “Õ neu Kesu, õ nigin aya wau laa fedig, õ nigin aya wau kulī yedig.”

¹² Kaisā bagai, Awa Uurem sur fiyē di, gerere tuan ilen. ¹³ Ì gerere tuan an, naa foti ibod mog, Satanem kisi fiyen. Ì gaar kuī geid difar mog, engel idim anī ì disennen.

Jesus Nē Dō Fiya Tar Uyulil Iweignēdin
(*Matyu 4:12-22; Luk 4:14, 15; 5:1-11*)

¹⁴ Jon kalabus bun dinenen ibod mog, Jesus Galili ile, Negur nē biya od anī kurō feis iron. ¹⁵ Ì iron, “Sain mogo isil. Negur nē tano mogo melsak. Wauī falei wog fen, biya od enī nigin wauī momoi gei!”

¹⁶ Jesus Galili maañ yeri iyo ken, ì Simon, ne tura Endru ado, daliyou bun kakāg dirā mog, iledin, ere nigin, idi gau yaleya tamo. ¹⁷ Jesus iron, “Usig, dō wiyag, aya ā tamo gei fiya nigin aneyeif.” ¹⁸ Sain anī bun bai, nedi kakāg ditor ken, ì dō difiyen.

¹⁹ Sain ì naal iyok ile fen, ì Sebedi naal Jems, tura Jon ado, waag namen, idi neid kakāg dodok dife mog, iledin. ²⁰ Kaisā bagai, ì iweignēdin. Age fe di, idi temeid Sebedi, in kabī tamo oroi yaledin anidi geid waag bun ditorneid fen, Jesus dō difiyen.

Jesus Kaa Sane Irun
(*Luk 4:31-37*)

²¹ Idi Kapenaum taun dilen. Sain Juda neid uub naa Sabat wō ye di, Jesus Juda neid uub fō namen ile fen, od ifelnēdiya gariya inon. ²² Tamo kayau in od nigin terē den, ere nigin, ì tamo yana adom gen ifelnēdin, ì lo ifelnēdiya tamo gen sā. ²³ Agef mog bai, tamo taka kaa sanem ironen anī, nedi uub fō namen an kañ ye iron, ²⁴ “Õ amā ere naig wamā fenē, Jesus Nasaret tamal? Õ amā

daig wamã fenẽ nigin usil de? Aya õ nigin keleĩ, Negur nẽ Fateul bagai!”

²⁵ Jesus total ado iron, “Foro wol! Ì namen tamal ulõ weis!” ²⁶ Kaa sane, tamo anĩ total bagai yokũ fiyẽ, sur fiyẽ, ira ken, kaĩ ye, ulõ yesin.

²⁷ Tamo kayau ganan terẽ de fen, abob toti difen, “Eĩ ere? Keleĩ mata, agef fen, total ado! Ì irõ di, kaa seseneg dõ difedig.” ²⁸ Ì age fen anĩ nẽ od kaisã bagai, Galili kalilĩ fiya fonõ anĩ adok iyokelen.

Jesus Musei El Fedin
(Matyu 8:14-17; Luk 4:38-41)

²⁹ Sain Juda neid uub fõ ditor ken, kututũ desin, idi Jems Jon ado weim, Simon Endru ado neid fõ bun dilen. ³⁰ Simon nẽ mam, ì bouwa uruwa odug ado nigin fatarẽ yenen, anĩ idi ì nigin Jesus dirokenen. ³¹ Anĩ nigin, Jesus kayau wagen ile, kayau ima yales irou isennẽ di, fã yen. Age fe di, bouwa uruwa anĩ kayau folo fiye kele di, kayau ì aruneid yalen.

³² Aragau anĩ bun gaa kuru kel mog, tamo kayau dagi adodo, kaa sesen adodo ganan, Jesus wagen guri difeid, disin. ³³ Taun anĩ nẽ tamo kayau ganan, fofomala anĩ bun guru difen. ³⁴ Anĩ bun, Jesus, tamo kayau dagi fire fire adodo musei el fiyẽdin, kaa sesen musei irudi di, diyawon. Anĩ ere, kaa sesen idi ì nigin kelein. Anĩ nigin, idi to wogõ douf nigin nigin sigoreid ifofan.

Jesus Moilin Negur Kosẽ Fiyen
(Luk 4:42-44)

³⁵ Bonimeĩ bagai mumurei ado, Jesus fã yale, fõ itor, moilin ile, an Negur kosẽ fiyen. ³⁶ Simon ì, ne tã tar geid dimirne ken, dilen. ³⁷ An fotou difiye ken, idi dirokenen, “Tamo kayau ganan õ dimirnok!”

³⁸ Jesus aitedin yale iron, “Ada uyu takã talauf, fonõ melsã anĩ bun. Aya aneg od arõf, anĩ nigin aya asin.” ³⁹ Age ye fen, Jesus Galili kalilĩ fiya ganam bun iyo ken, nedi uub fõ fõ bun od iro ken, kaa sesen irudi di, diyawon.

Tamo Taka Lepra Dagi Ado
(Matyu 8:1-4; Luk 5:12-16)

⁴⁰ Tamo taka lepra dagi ado, ã wagen isi, ibor bobou fe fen, igon, “Õ oroyõf are, el wiyauf.”

⁴¹ Jesus wau gudũf fen, ima irã, kobũ fiye ken, ã iron, “Aya wau irok, õ bouwã biyaf!” ⁴² Age ye di, kaisã bagai lepra guruma ã itornẽ di, bouwa biya len.

⁴³ Jesus kaisã bagai total bagai weder irou fen, sur fiyẽ di, ilen: ⁴⁴ “Karĩ welei, enĩ aib taka to urokenẽf, anĩ ere, õ pris wagen ule, õ bouwã ufelnẽf, õ bouwã biyal anĩ nigin Moses nẽ od irok anĩ dõ fen, sesewi fiya wenẽf, anĩ bunem yaore di, tamo kayau dilouf.” ⁴⁵ Anĩ ere, ã iyok ile fen, kurõ feis irõ di, od anĩ iyokelen. Anĩ nigin, Jesus mal atun taun taka bun to iledig, ã moilin ibodon. Anĩ ere, tamo kayau firen firen temeleid fau fau ã wagen disidig.

2

Jesus Tamo Bouwa Ilolaisin Anĩ El Fiyen
(Matyu 9:1-8; Luk 5:17-26)

¹ Naa tunĩ bure fele di, Jesus baban Kapenaum taun ile di, tamo kayau idi, ã fõ taka bun ibodok yeya anĩ karĩ den.

² Anĩ nigin, tamo kayau musei guru difen, fõ aaben ado fofomala dino dale di, modoũ san. Age dife di, Jesus od irokenẽdin. ³ Jesus od irokeneĩd mog, tamo tunĩ tamo ilolaisin anĩ tamo aiwa ifenẽyam faali de, dirou disin. ⁴ Idi ã Jesus garan irou ileya kisi feleya sã, ere nigin, tamo kayau musei, anĩ nigin, idi Jesus ibodok nẽ fõ soko anĩ korõ difel fen, tamo gabgab bun yen mog, folo folõ dife di, isilen.

⁵ Jesus idi neid momoiya ile fen, ã tamo ilolaisin irokenen, “Kesu, ogon mosor alelkonok.”

⁶ Age fe di, lo ifelnēdiya tamo tunī an dibodon, idi dogo namedin kisi difen, ⁷ “Ere nigin ã age irok? Ì kono fef! Taka nem mosor yaleleya to yenek, Negur yogo dogol.”

⁸ Kaisã bagai, Jesus yogon kisi bun, idi waudim kisi difen anī kelein. Agef fen, ã idi irokenēdin, “Ã ere nigin agog kisi gef? ⁹ Tamo ilolaisin anī irokenēya nigin nanī anī karika, ‘Ogon mosor alelkonok’ de, ‘Fã wo, ogon gabgab wale fen, uyok ule’? ¹⁰ Anī ere, Tamo Naal ã tenebur ein mosor yaleleya nigin yana ado anī, ã keleī youf nigin...” Age ye fen, ã tamo ilolaisin anī irokenen, ¹¹ “Aya õ arokonok, fã wo, ogon gabgab wale fen, fõ bun ule.” ¹² Ì fã yale, ganan meleid bun in gabgab yale iyok ilen. Age fe di, tamo kayau ganan terē de fen, Negur yana dales diron, “Ada kulu ereb eig fiya taka to tailen!”

Jesus Lewi Iweignen

(Matyu 9:9-13; Luk 5:27-32)

¹³ Jesus ã baban daliyou sirin ilen. Tamo kayau musei ã wagen disile di, ã od gariya ino ifelnēdin. ¹⁴ Ì iyok ile, Lewi, Alfeus naal, takis yaleya fõ bun ibod mog, ile fen, irokenen, “Aya dõ wiya.” Age ye di, ã fã yale, dõ fiyen.

¹⁵ Jesus Lewi nē fõ bun saaf yõ mog, takis yaleya tamo musei, mosor adodo tamo kayau musei, ã, in dõ fiya tar geid, weim saaf don, ere nigin, idi musei Jesus dõ difiyen.

¹⁶ Sain lo ifelnēdiya tamo, Farisia tamo idi, Jesus ã takis yaleya tamo, mosor adodo tamo kayau geid, weim saaf doko dibod mog, dileid fen, idi in dõ fiya tar anī to difiyēdin, “Ere nigin ã takis yaleya tamo, mosor adodo tamo kayau geid weim doko?”

¹⁷ Anī karī ye fen, Jesus idi irokenēdin, “Dagi sã anidim dokta bun ileya nigin waud to yenek, dagi adodom dogol.

Aya madur tamo anidi iweignēdiya nigin to asin, mosor adodo tamo anidi iweignēdiya nigin asin.”

Kuri Nigin Jesus To Difiyen

(Matyu 9:14-17; Luk 5:33-39)

¹⁸ Jon nē dō fiya tar, Farisia tamo geid, idi kuri den. Tamo tunī disi, Jesus to difiyen, “Naig fe di, Jon nē dō fiya tar, Farisia tamo nē dō fiya tar geid, idi kuri dedig, anī ere, ogon idi sã?”

¹⁹ Jesus aitedin yale iron, “Naig fe di, mois tamo ibod mog, in tamo tar idi kuri douf? Idi to age difouf, ere nigin, ī idi geid fau dibodok. ²⁰ Anī ere, naa fau isi di, anī bun mois tamo idi bun tamal yalelnē di, naa anī bun gama idi kuri douf.

²¹ “Tamo taka, gabar tubu, gabar masak mata ado baguf fen, to iwauf. Taka ī age fouf are, masak mata anim tubu arirī fe di, tubu kundef irailauf. ²² Takag age fiya, taka nem wain mata meme gabar* tubu bun to itinēf. Ī age fouf are, wain anim age fe di, meme gabar gē ye fen, serek fouf. Age fe di, wain meme gabar ado sane lauf. Age fiya nigin, ī wain mata meme gabar mata bun itinēf.”

Jesus Ī Sabat Nē Odug

(Matyu 12:1-8; Luk 6:1-5)

²³ Sabat naa† taka bun, Jesus in dō fiya tar geid, wit kabī atu diyok dile fen, idi wit biya tunī fito difen. ²⁴ Age dife di, Farisia tamo idi Jesus dirokenen, “Ulef, ere nigin idi Sabat naa nē lo difodul ken, Sabat naa bun oug difef?”

²⁵ Jesus irokenēdin, “Sain Dawid, ne tã tar geid naū fedī di, saaf lau de fen, Dawid age fen anī, ã to uwesegen de? ²⁶ Abiata, pris mudur ado ibodon sain anī bun, Dawid

* 2:22: Juda neid tobonunã, idi meme gabar nem darum diwadig. † 2:23: Sabat naa anī, Juda neid uub nē naa.

ĩ Negur nē fō namen ile fen, bret fateul prisem dogol dōdig[‡] an ibodon anĩ yokon, ĩ bret tunĩ, ne tã tareg ifenēdin.”

²⁷ Age ye fen, ĩ idi irokenēdin, “Tamo isennēya nigin Sabat naa inon, tamom Sabat naa anĩ isennēf nigin to inon. ²⁸ Anĩ nigin, Tamo Naal ĩ Odug, Sabat nēg ĩ Odug.”

3

Tamo Taka Ima Sitakã Gege Fefu Fiya (Matyu 12:9-14; Luk 6:6-11)

¹ Sain taka, Jesus baban Juda neid uub fō bun ilen. Tamo taka ima sitakã gege fefu fen anĩ, an ibodon. ² Tamo tunĩ an difaren idi, Jesus bouwa bun od dinouf nigin naab dimiren, anĩ nigin, idi ĩ Sabat naa bun tamo anĩ el fiyē mog, dilouf nigin ololo difen. ³ Jesus tamo ima fefu fiya anĩ irokenen, “Ganan meleid bun fã, ufar.”

⁴ Age ye fen, Jesus idi to fedin, “Nanĩ anĩ Sabat naa bun lo dō fiya? Tobonunã biya age fiya anĩ de, tobonunã sane age fiya anĩ; isennē di, mata ibodōya anĩ de, yukesiya anĩ?” Anĩ ere, idi nin kē delen.

⁵ Jesus seye ye fen, idi fele fedin, idi waud togun nigin, ĩ wau odug gudūf fen, tamo anĩ irokenen, “Ogon imã yaĩ wo.” ĩ yaĩ fe di, in ima oditekei biya len. ⁶ Age fe di, kaisã bagai Farisia tamo idi kututū deis dile, Herod nē dō fiya tar weim, idi Jesus naig de dukesiyouf nigin od katō difen.

Tamo Kayau Musei Jesus Dō Difen

⁷ Jesus in dō fiya tar geid, daliyoun disile di, tamo kayau musei Galili temeleid dō difen. ⁸ Jesus ĩ ereb ereb ganan age fen anĩ karĩ de fen, tamo kayau musei Judia distrik, Jerusalem taun, Idumea distrik, Jordan naan kalilĩ fiya, Taia Saidon ado kalilĩ fiya adok, ĩ wagen disin. ⁹ Tamo

[‡] 2:26: Lo bun, bret fateul anĩ, prisem dogol dōdig.

kayau museim Jesus to sile difiyēf nigin, ī yogon waag naal taka dodok de yenēf nigin, in dō fiya tar irokenēdin. ¹⁰ Ere nigin, ī mogo musei el fedin. Anī nigin, idi dagi adodo Jesus kobū fiya nigin abob susur difedin. ¹¹ Kaa sesen Jesus dilef sain ganan, idi ī wagen kuku de, den ken, diweig dirōdig, “Ō Negur Naal.” ¹² Anī ere, Jesus, ī aib anī, to wogō douf nigin total bagai katū fedin.

Jesus Aposel Tuwelf Igirnēdin

(Matyu 10:1-4; Luk 6:12-16)

¹³ Jesus arei wala bun isel ibod ken, idi ī aib aib oron anī iweignēdin. Age fe di, idi ī wagen disin. ¹⁴ Jesus ī tuwelf gei fen, aposel wowā douf nigin igirnēdin, are idi Jesus geid fen, dum biya od wogō douf nigin fau sur fediyouf, ¹⁵ idi total dale fen, kaa sesen dirudiyouf nigin age fen. ¹⁶ Jesus tuwelf igirnēdin enidi, are Simon (Jesus ī yana yun Pita), ¹⁷ Jems Sebedi naal, tura Jon ado (Jesus idi yeneid yun Boaneges, anī nē gariya, Kolimei Gere Tar), ¹⁸ Endru, Filip, Batolomyu, Matyu, Tomas, Jems Alfeus naal, Tadeus, Simon Selot* taka, ¹⁹ Judas Iskariot, ī dum Jesus kiwai imeid bun inenen.

Jesus Belsebub Ado Difiyen

(Matyu 12:22-32; Luk 11:14-23; 12:10)

²⁰ Jesus ī, fō taka bun ile di, tamo kayau musei baban guru difen. Anī nigin, Jesus in dō fiya tar geid, saaf yōya kisi feleya san. ²¹ Jesus nē tura tar od anī karī de fen, idi ī dale diroulauf nigin dilen, ere nigin, idi diron, “Ī neneya kisi ado.”

²² Age dife di, lo ifelnēdiya tamo Jerusalem temeleid disi diron, “Ī Belsebub ado, ī kaa sesen neid mudur yana bunem, kaa sesen irudidig.”

* **3:18:** Juda neid kusī mala taka, idi Rom gawaman ado kusī dedig.

²³ Anĩ nigin, Jesus idi iweigneĩd fen, yaab od nem irokenẽdin, “Satan ĩ naig Satan iruwauf? ²⁴ Tano tekelei anĩ, yogo faraf, kiwai ifenẽf are, tano anĩ to ifarauf. ²⁵ Fõ tekelei anĩ, yogo faraf, kiwai ifenẽf are, fõ anĩ to ifarauf. ²⁶ Takag, Satan ĩ yogo faraf, kiwai ifenẽf are, ĩ to ifarauf, in sain mogo bure felef. ²⁷ Anĩ ere, taka nem tamo total ado nẽ fõ bun safina gei fou fenẽ, tamo total ado ket ifokel fen, anĩ ĩ yogon fõ bun bẽ yalouf. ²⁸ Aya ã momoi arokeneik, tamo neid mosor ganan ado kono difef are, fau yalel kenẽdiyof. ²⁹ Ani ere, aibem taka Awa Uur Fateul kono fiyek, in mosor to yalelauf, in mosor anĩ faimud ibodkalauf.”

³⁰ Jesus od enĩ iron, ere nigin, idi dirõdig, “Ĩ kaa sane ado.”

*Jesus Nẽ Sina, Tura Tar Geid
(Matyu 12:46-50; Luk 8:19-21)*

³¹ Age ye di, Jesus nẽ sina, tura tar geid disin. Mayarẽ difar mã, idi Jesus dirokenẽf nigin taka sur difen. ³² Tamo kayau musei ĩ salili difiyek dibodon, idi ĩ dirokenen, “Ogon sinã, turã tar geid, mayarẽ õ dimirnok.”

³³ Jesus to fedin, “Ai anĩ neu naai, neu turau tar?”

³⁴ Age ye fen, ĩ, salili difiyẽ dibodon idi lo feid fen, ĩ iron, “Enidi anĩ neu naai, neu turau tar! ³⁵ Aib idi Negur nẽ oroya dõ difedig anidi anĩ, neu turau, neu mainou, neu naai.”

4

*Faat Irarãya Tamo Nẽ Yaab Od
(Matyu 13:1-23; Luk 8:4-15)*

¹ Jesus baban daliyou sirin, gariya ino, od ifelnẽdin. Tamo kayau guru de, salili difiyen anĩ gai musei biya, anĩ nigin, tamo kayau adok ubun difar mog, ĩ waag taka daliyoun ifaren anĩ namen isil ibodon. ² Agef fen, ereb

ereb musei yaab od nem ifelneïd fen, iron,³ “Karĩ gei! Kabĩ marau taka faat irarãf nigin ilen. ⁴ Sain ï irarak ile mog, tunĩ naab luwen kuku ren, are ninã disi dakasin. ⁵ Tunĩ meein tuar kuku ren, an teneub badagar. Are kaisã bagai fokũ den, ere nigin, teneub are badagar bagai. ⁶ Anĩ ere, sain gaa ise di, bali are ilalaid, laasi yedin, ere nigin, idi warumutei sã. ⁷ Faat tunĩ malũ duri atun kuku ren, are malũ duri anĩ fã ye fen, sile feledin, anĩ nigin, biya to yun. ⁸ Faat tunĩ teneub biya bun kuku ren, are idi fokũ yedin, oduduge di, biya imadin, taka biya teti, taka biya siksti, taka biya wan handred, age fef ilauf.”

⁹ Age ye fen, Jesus iron, “Taka ï karĩya nigin weder ado, ï karĩ youf.”

¹⁰ Sain Jesus ï yogo ibod mog, yogon dõ fiya tar tuwelf, tamo tunĩ salili difiyen anidi geid, yaab od nigin ï to difiyen. ¹¹ Jesus idi irokenẽdin, “Negur tano nẽ waa are Negur mogo ifenein, anĩ ere, idi dumeitur onudi nigin, ereb ereb ganan yaab od bunem wogõ yef, ¹² ere nigin, “ ‘idi meledim diledig, anĩ ere, idi meleid fokõya sã,

idi wederedim karĩ dedig, anĩ ere, idi gariya keleĩ sã. Age fiya sãf are, idi waud falei de di, mosor yalel kenẽdiyof.* ”

¹³ Age ye fen, Jesus idi irokenẽdin, “Ã yaab od enĩ wauĩ to fokõ youf? Age fiyauf are, naig fe di, ã yaab od tunĩ nigin wauĩ fokõ youf? ¹⁴ Faat irarãya tamo, biya od irarak. ¹⁵ Tamo tunĩ idi faat naab luwen kuku ren gen, an biya od iraran. Idi karĩ de mog, kaisã bagai Satan isi, biya od idi namedin iraran anĩ yaleledig. ¹⁶ Tunĩ idi faat meein tuar iraran gen, idi od anĩ karĩ de fen, kaisã bagai dale fen, waud bun kulĩ dedig. ¹⁷ Anĩ ere, idi warumutei sã, anĩ nigin, idi sain meluk to dibodõf. Sain, biya od nigin, morõ be kafĩ fiya be isif, idi kaisã bagai dirofosif. ¹⁸ Tunĩg faat

* 4:12: Asaia 6:9, 10

malū duri atun iraran gen, idi biya od karī den. ¹⁹ Anī ere, tenebur mata ibodōya nē sii fiya, safina ado ibodōya nē kisi fiya, oroya fire fire isif anidim, biya od sile fe di, anim biya to yūf. ²⁰ Tunī faat teneub biya bun iraran gen, idi biya od karī den, dale di, anī biya yūf, taka biya teti, taka biya siksti, taka biya wan handred, age fef ilauf.”

Lam Yoki Bun
(Luk 8:16-18)

²¹ Jesus idi irokenēdin, “Ā lam urou usig, beī kuren be fatar farumen unogouf de? Age fiya ban, ā lam yogon yoki bun to useginnēgouf de? ²² Ereb erob ganān iminēyan yenek anī ganān yaor fouf, erob erob ganān nar fen yenek anī ganān irou isi, biru fel fen, yaau du fouf. ²³ Taka ī karīya nigin weder ado, ī karī youf.”

²⁴ Jesus idi irokenēdin, “Ā od karī gef anī, ed ge kisi gouf, ā idi nigin kisi gef gen, ā niginēg age de kisi difouf, anī tobol feneif. ²⁵ Aib taka ī ado, wal fiya ifenēf, aib taka ī sā, erob erob ī ado anīg ī bun yalelauf.”

Faat Odugef Nē Yaab Od

²⁶ Takag Jesus iron, “Negur nē tano are eig fiya gen, tamo taka teneub bun faat irarak. ²⁷ Bō ado gaa ado, tamo ī mulaī yenek, fā ye iyok, faat fokū ye fen, odugef, anī ere, ī naig be fe odugef, ī keleī sā. ²⁸ Teneub yogo dogol biya inodig, uyulil bali, age fe di, turu, anī turu bun biya inodig. ²⁹ Biya bure fele di, kaisā bagai ī dimig gunō waila ado inodig, ere nigin, biya yaleya sain isif.”

Masted Faat Nē Yaab Od
(Matyu 13:31, 32, 34; Luk 13:18, 19)

³⁰ Baban Jesus iron, “Negur nē tano, ere taka age fiya tauf? Ere bunem yaab tafouf? ³¹ Ī masted faat age fiya. Ī faat memereis bagai ā teneub bun utenēgedig. ³² Anī ere, ī utenēge di, ī odugouf, ī kabier saaf ganān wal fediyouf,

in beneir odudug irara ken, buri ino di, ninã ilun temeleid disi dibodõf.”

³³ Jesus yaab od age fediya musei bunem, tamo kayau idi keleĩ youf kisin, od wogõ fiyẽdin. ³⁴ Ì tamo kayau ereb od irokenẽdiyou fenẽ, yaab od bunem dogol. Anĩ ere, ì mugu yogon dõ fiya tar geidef are, ereb ereb ganan faded fedidig.

Jesus Yau Uyẽ Ado Irokenẽdi Di, Kee Delen

(Matyu 8:23-27; Luk 8:22-25)

³⁵ Naa anĩ bun aragau di, Jesus in dõ fiya tar irokenẽdin, “Ada daliyou sitakã talauf.” ³⁶ Idi tamo kayau ditorneĩd fen, Jesus waag bun ibod mog, idi ì dale dirou dilen. Waag tunig weim dilen. ³⁷ Yau odug fã ye di, maaĩ fã ye, waag yu ken, maaĩ ifilege di, waag namen isokosen. ³⁸ Jesus ì, waagibun edẽ bun mulaĩ yen mog, idi ì turĩ difiyẽ dirokenen, “Tise, ada naanũ talalau fenẽ, õ to kisi walef de?”

³⁹ Ì fã yen, yau sakã fiye ken, maaĩ irokenen, “Kee resig fen, dẽ weleg!” Age ye di, yau dẽ yele di, maaĩg oditekei dẽ yelen.

⁴⁰ Jesus in dõ fiya tar irokenẽdin, “Ere nigin ã kumĩ wogef? ã fau momoiya sã de?”

⁴¹ Idi fatuk bagai kumĩ tererẽ de fen, abob toti difen, “Eĩ aim bagai? Ì irõ di, yau maaĩ adog ait dõ difef!”

5

Jesus Tamo Taka Kaa Sesen Musei Ado El Fiyen

(Matyu 8:28-34; Luk 8:26-39)

¹ Idi naan daliyou dibal dile, Gerasa teneub bun wõ den. ² Jesus waag bun tamal kutũ yesi di, tamo taka kaa sane ado, matmat bunem ì fotou fiyẽ fenẽ isin. ³ Tamo matmat bun ibodon anĩ, taka nem ì ifõya nigin kisi feleya sã, sen nemeg ifõya kisi feleya sã. ⁴ Ì sain musei sen nem, ye ima

ado difofädig, anĩ ere, ĩ sen kokour fel, yem ain weweur fedig. Taka nem total ino fen, ĩ ifõ di, dē yeleya kisi feleya sã. ⁵ Sain ganan bõ ado gaa ado, ĩ matmat atun ado areineg iweig kaĩ ye fen, meinem yogo bouwa kokour fedig.

⁶ ĩ mala irakelen, Jesus gerom ile fen, gudu ref ile, Jesus wagen kubũ ye, ibor bobou fen. ⁷ ĩ ait odug nem iweig iron, “Õ aya ere naig wiyau fenē, Jesus, Negur Ilun Bagai nē Naal? Negur yana nem aya õ agonok, õ aya to daig wiyauf!” ⁸ Ere nigin, ĩ mogo kaa sane irokenen, “Õ tamo enĩ bun tamal ulõ weis!”

⁹ Age ye fen, Jesus ĩ to fiyen, “Õ yanã ai?”

ĩ iron, “Aya yanau Ami, ere nigin, amã musei biya.” ¹⁰ Jesus idi akor anĩ bun tamal to irudiyouf nigin, ĩ baba baban Jesus igonen.

¹¹ Melsã arei wala sirin, bor musei biya saaf doko difaren. ¹² Kaa sesen Jesus digonen, “Amã bor atun susur wamãf, yo wamã di, idi namedin malalauf.” ¹³ Jesus idi yo fedi di, kaa sesen ulolõ deis disel, bor namedin dilelen. Bor, tu tausen age fiya, gududu de, bebeig sane baurin daliyoun disel, naanũ gare desin.

¹⁴ Bor lo fiya tamo diya dile, od anĩ taun ado fonõ fonõ wogõ den. Age dife di, tamo kayau ereb wõ yen anĩ dilou fenē dilen. ¹⁵ Sain idi Jesus garan wõ den, idi meleid dirã, tamo kaa sesen museim dirounen anĩ, an garab yel, kisi biya ado ibod mog, dilen. Anĩ nigin, idi kumĩ den. ¹⁶ Tamo idi meledim dilen anidim, kaa sesenem tamo diroun anĩ ado bor age difen anĩ nigin, tamo kayau wogõ difiyēdin. ¹⁷ Age dife di, tamo kayau, Jesus ĩ idi neid teneub anĩ itor ilauf nigin digonen.

¹⁸ Age de di, Jesus ĩ waag bun sõ ye mog, tamo kaa sesenem dalen anĩ, Jesus ado dilauf nigin nonĩ fiyen. ¹⁹ Jesus ĩ to awa yokon irokenen, “Õ fonõ ogon ibor tar gedin ulauf, Odug õ nigin age fen anĩ ado, ĩ naig fe fen, õ

nigin wau yun anĩ, idi urokenēdiyof.”²⁰ Age ye di, tamo anĩ itor ilen, Jesus ĩ nigin age fen anĩ, Dekapolis* teneub bun tamo kayau wogō fiyēdi di, idi ganan terē den.

*Kayau Naal Laa Fen Ado Dagi Kayau Taka
(Matyu 9:18-26; Luk 8:40-56)*

²¹ Jesus baban waag bun ibal, naan daliyou sitakā ilen, ĩ daliyou yerin ibod mog, tamo kayau musei disu salili difiyen. ²² Age de mog, Juda neid uub fō lo fiya nē mudur taka, yana Jairus an isin. ĩ Jesus ile fen, ĩ ye gariyan kubū yen. ²³ ĩ igone ken, irokenen, “Nau barai naal oboim fef. Uma fen, imā teten uno di, ĩ biyal, matauf.” ²⁴ Anĩ nigin, Jesus ĩ uruwom dilen.

Tamo kayau musei dō difiyē, kitikiti de, susir difiyek dilen. ²⁵ Kayau taka idi atun an ifaren, ogō dagi faimud ado yar tuwelf iyon. ²⁶ Kayau anĩ dokta musei bun ilen, anĩ ere, bouwa bun morō odug idi bun yalen. Agef fen, yogon safina ganan irailen. Anĩ ere, kayau ĩ bouwa biya leya ban sane len. ²⁷ Sain kayau ĩ Jesus nigin karī yen, ĩ Jesus dume dōf, tamo kayau atu ile, in kolos kobū fen, ²⁸ ere nigin, kayau ĩ kisi fen, “Aya in gabar dogol kobū afouf, are deuf, aya fau biyauf.” ²⁹ Kaisā bagai, kayau naud segē yelen. Age fe di, kayau ĩ yogo bouwa bun karī yen, are karika len.

³⁰ Kaisā bagai, Jesus in total ĩ bun tamal ul fe yale mog, karī yen. ĩ tamo kayau atun falei yel, to fedin, “Aim neu kolos kobū fel?”

³¹ In dō fiya tar Jesus dirokenen, “Tamo kayau musei ō kiti diyok, ule fen anĩ, ō ‘Aim aya kobū fiyal?’ wof.”

³² Anĩ ere, Jesus ĩ aibem age fen anĩ ilouf nigin, fau fau fai yen. ³³ Age fe di, kayau ĩ yogo ereb age fen kelei ken, Jesus wagen isi, ye gariyan kubū yen. ĩ kumĩ tererē ye fen, momoi od ganan Jesus irokenen. ³⁴ Jesus kayau irokenen,

* 5:20: Anĩ nē gariya, Ten Taun.

“Nau barai, ogon momoiya anim el yom. Waũ unois ule, dagi anim to iföyöf.”

³⁵ Jesus fau od wogō ye mog, tamo tunī, Juda neid uub fō lo fiya mudur Jairus nē fō bunem disin. Idi diron, “Nē barai mogo laa fel. Ere nigin ō tise fau morō wenek?”

³⁶ Jesus od idi diron anī idod ken, Juda neid uub fō lo fiya mudur anī irokenen, “To kumī wo, momoi dogol wo.”

³⁷ Jesus ī takam dō fediya nigin katū fedin, Pita, Jems, ne tura Jon idim dogol. ³⁸ Idi Juda neid uub fō lo fiya mudur nē fō bun ulō deis fen, Jesus mala iran, tamo kayau waud gudūf fen, inā legur mog, iledin. ³⁹ Jesus aaben ile fen, idi irokenēdin, “Ere nigin ā fatuk bagai inaī gef? Kayau naal ī laa fiya sā, ī mulā yenek.” ⁴⁰ Anī ere, idi Jesus kasā difiyen.

Age dife di, Jesus idi irud le fen, ī kesu nē sina tama ado, in dō fiya tar geid, kesu yenen nē namen dilen. ⁴¹ Jesus ī imalē yalesne ken, irokenen, “Talita kum!” (anī nē gariya, “Kayau naal, aya ō arokonok, fā wo!”). ⁴² Kaisā bagai, kayau naal fā yale iyon (ī yar tuwelf ado). Anī nigin, idi oditekei terē den. ⁴³ Anī ere, taka to diro ken, karī youf nigin, Jesus totol bagai katū fedin. Agef fen, ī kayau naal saaf difenē di, yāf nigin irokenēdin.

6

Profet Taka Fō Gariyan Yana Sā

(Matyu 13:53-58; Luk 4:16-30)

¹ Jesus an itor ken, in dō fiya tar geid yogon fō gariyan dilen. ² Sabat naa wō ye di, Jesus Juda neid uub fō bun ifelnēdiya gariya inon. Age fe di, musei ī karī difiye ken, terē de diron,

“Tamo enī ereb ereb enei nain gei fen? Eī ere keleī anī ī ifenen? Anī bunem ī memelikeg inodig. ³ Ī to kapenta de? Ī to Maria naal fen, Jems, Josef, Judas, Simon ado tureid

de? In main tar ada to ein weim de?” Age de fen, idi ï kiwai difenen.

⁴ Jesus idi irokenēdin, “Profet taka ï, in fō gariyan, in sirag atun ado, in fō bun dogol, ï yana sā.” ⁵ ï an memelik taka inoya kisi feleya sā, anī ere, ï dagi tamo teke tekelei dogol ima tetedin ino fen, el fedin. ⁶ Jesus idi neid momoiya to ile fen, terē yen.

Jesus In Dō Fiya Tar Tuwelf Sur Fedin

(Matyu 10:5-15; Luk 9:1-6)

Agef fen, Jesus fonō fonō iyo ken, od ifelnēdin. ⁷ Jesus tuwelf iweignēdi di, idi ï wagen disin. ï uru uru, sur feid fen, kaa sesen dirudiyouf nigin, idi megeir ifenēdin.

⁸ ï fadim yu ken, iron, “Delē uyōgouf nigin ereb taka to walogouf, bret sā, kodol sā, moni sā, manig dogol. ⁹ Sendel ufonūg fen, gabar ufilaīgef dogol, taka to walogouf. ¹⁰ Ereb sain ā fō bun ulagauf, an ubodōgef uleg, taun anī utorōgouf. ¹¹ Fonō taka bun ā to daleyēi ken, ā to karī diyēif, sain ā fonō anī utorōg fen, yeī aas tu welege di, idi ā kiwai difenein anī keleif.”

¹² Tamo kayau waud falei youf nigin, idi dile, od wogō den. ¹³ Idi kaa sesen musei diruid fen, tamo kayau dagi ado musei mouf diguneid, el difedin.

Jon Naan Igunēdiya Tamo Ula Gudū Difen

(Matyu 14:1-12; Luk 9:7-9)

¹⁴ King Herod Jesus nigin od karī yen, ere nigin, Jesus nē yana fō fō ganan karī den. Tunī diron, “Jon naan igunēdiya tamo, ï laa bun tamal kel fā yen, anī nigin, memelik nē total ï bun kabī yalef.”

¹⁵ Tunī diron, “ï Eliya.”

Tunī diron, “ï profet taka, profet kulu temeleid taka gen.”

¹⁶ Anĩ ere, sain Herod od enĩ karĩ ye fen, ĩ iron, “Jon, tamo anĩ ayam ula gudũ afen, ĩ laa fen anĩ kel fã yen!”

¹⁷ Ere nigin, kulu Herod ĩ irõ di, Jon dale difo ken, kalabus bun dinenen. Are Herod yogo tura Filip nẽ kayau Herodias yalen nigin, ¹⁸ Jon Herod irokenẽdig, “Õ turã nẽ kayau son won, are lo ufodulen.” ¹⁹ Herodias Jon nigin name sane fen, ĩ dukesiyouf nigin wau iron. Anĩ ere, ĩ kisi feleya sã, ²⁰ ere nigin, Herod Jon kumĩ fiye ken, ĩ, Jon anĩ madur fateul tamo ye fen, kulatun fedig. Sain Herod ĩ Jon nẽ od karĩ yedig, ĩ wau togudig, anĩ ere, ĩ in od karĩya nigin orodig.

²¹ Dum sain biya wõ yen, Herod ĩ sina gõ fen anĩ nẽ naa bun, in kabĩ tamo odudug, in kusĩ mudur adodo, Galili teneub bun uyu irouya tamo anidi nigin tar inon. ²² Sain anĩ bun, Herodias nẽ barai isi, seg kui ye fen, dole di, Herod in tamo tar geid waud al fen.

Anĩ nigin, king kayau momoul irokenen, “Ereb taka nigin waũ iro ken, to wiyauf, are õ afonõf.” ²³ Age ye fen, ĩ wau adok kuturol fen, kayau momoul irokenen, “Ereb taka nigin õ to wiyauf, aya neu tano anĩ fara af, uru afe fen, sitakã ifonõya kisin anĩ afonõf.”

²⁴ Kayau momoul ile, sina irokenen, “Ere bagai nigin aya to afiyẽf?”

Sina iron, “Jon naan igunẽdiya tamo nẽ mudur nigin.”

²⁵ ĩ kaisã bagai ile, king irokenen, “Aya gama bagai Jon naan igunẽdiya tamo nẽ mudur, beĩ bun uno wanauf anĩ orouf.”

²⁶ King ĩ wau togun bagai, anĩ ere, in wau kuturol fen, tamo kayau meleid bun mogo iron nigin, ĩ kayau nẽ od yaleleya itoron. ²⁷ Anĩ nigin, king kaisã bagai ula gudũ fedig kabĩ tamo, Jon nẽ mudur yale irou isiyouf nigin sur fiyen. Age fe di, ĩ ilen, kalabus bun Jon ula gudũ fen, ²⁸ mudur anĩ beĩ bun ino irou isin, kayau momoul ifenẽ

di, ï bam yale, sina ifenen. ²⁹ Jon nē dō fiya tar anī karī de fen, disin, in bouwa dale, matmat bun mū difen.

Jesus Faif Tausen Tamo Saaf Ifenēdin

(Matyu 14:13-21; Luk 9:10-17; Jon 6:1-14)

³⁰ Aposel idi Jesus wagen guru de fen, idi ereb age difen ado difelnēdin anī adok, wogō difiyen. ³¹ Age de mog, tamo kayau musei dilef disif difen, anī bunem, idi saaf yōya kisin san. Anī nigin, Jesus idi irokenēdin, “Ā aug dogol usig, aya geid talauf, modoū taka motikeleyan an si tanouf.”

³² Anī nigin, idi dogo dogol waag dale diya, moilin dilen.

³³ Anī ere, tamo kayau musei lo difeid mog, dilen nigin, idi nigin kelei ken, taun ganan bun temeleid idi yedim gududu de dile, idi ket an wowā den. ³⁴ Sain Jesus wō ye fen, mala iran, tamo kayau musei ileidin, ï idi nigin wau yun, ere nigin, idi sipsip marau sã gen. Anī nigin, ï ereb ereb musei idi ifelnēdin.

³⁵ Sain anī bun, gaa mogo kuru kelen, anī nigin, in dō fiya tar ï garan disu diron, “Eï gerere tuan, sain mogo sa kelel. ³⁶ Tamo kayau susur wodi di, dilauf, ago di, idi fonō kalilī fiya fonō fonō dile fen, dogo yōya nigin saaf na gei difouf.”

³⁷ Anī ere, ï aitedin yale iron, “Idi dāf nigin ereb āgem wenēdigouf.”

Idi ï dirokenen, “Tamo kayau musei nigin, saaf na yaleya moni odug biya. Ada tele, bret bun moni odug age fiya tara ken, tafenēdi di, dāf de?”

³⁸ Jesus idi irokenēdin, “Bret ganī ā ado? Uleg ulogouf.”

Idi kelei ken, Jesus dirokenen, “Bret faif, gau uru ado.”

³⁹ Age de di, Jesus, tamo kayau ganan, mala fire fire, fisir biya bun dibodadāf nigin, in dō fiya tar irokenēdin.

⁴⁰ Anī nigin, idi mala bun dibodadan, tunī wan handred, wan handred, tunī fifti, fifti. ⁴¹ Jesus bret faif gau uru ado

yale, saa ilun itad fen, ï Negur de fiye ken, bret mumã fen. Agef fen, ï in dõ fiya tar ifenēdin, tamo kayau wagedin dinodiyouf nigin. Ñ gau urug agef tamo kayau atun foif ifenēdin. ⁴² Idi ganan don kisi felen. ⁴³ In dõ fiya tar, tamo kayau bret gau ado dokon, tunĩ ditoraran anĩ fito difen, karam tuwelf isokosen. ⁴⁴ Faif tausen tamo anidim bret don.

Jesus Naan Teteatu Iyon
(*Matyu 14:22-33; Jon 6:15-21*)

⁴⁵ Kaisã bagai, Jesus, in dõ fiya tar waag bun, idi ketem Betsaida dilauf nigin, sur fedin. Agef fen, ï tamo kayaug irudin. ⁴⁶ Jesus idi itorneĩd fen, Negur kosē fiyēf nigin arein iselen.

⁴⁷ Aragau mog, waag daliyou atun ifaren, anĩ ere, Jesus ï yogo mugu teneub bun. ⁴⁸ Jesus in dõ fiya tar total bagai ful dife mog, iledin, ere nigin, yau odug biya wewu fedin. Maur oboi wele ye mog, Jesus daliyou teteatu idi gedin iyok ilen. Ñ wal fediyou fenē age fen. ⁴⁹ Anĩ ere, sain in dõ fiya tar meleid diran, Jesus daliyou teteatu iyõ mog, dile mã, idi kisi baraũ de fen, idi ui guri den, ⁵⁰ ere nigin, idi ganan ï dile fen, kumĩ tererē den.

Kaisã bagai, Jesus idi irokenēdin, “Total unog! Are ayam. To kumĩ wog.” ⁵¹ Age ye fen, ï idi gedyouf nigin waag bun sõ ye di, yau kee relen. Idi oditekei terē den, ⁵² ere nigin, idi bret bun waud to fokõ yen, idi neid waud katĩ felen.

Jesus Genesaret Oun Dagi Adodo El Fedin
(*Matyu 14:34-36*)

⁵³ Idi sitakã dibabal dale, Genesaret teneub bun wõ de fen, an waag difokel difaren. ⁵⁴ Idi waag bunem kututũ deis mog, tamo kayau enei Jesus yeya idi kelein. ⁵⁵ Idi Jesus an ibodok yeya karĩ def are, idi fonõ anĩ kalilĩ fiya adok

gududu de fen, dagi tamo gabgab ado guri difedi di, disin.
⁵⁶ Sain ganan, modoũ fire fire bun, Jesus ilen, fonõ fonõ, taun tunĩ, taun dumeitur, tamo kayau idi maket modoũ bun dagi tamo dinenēdin. Idi yogon gabar iri kobũ difouf nigin Jesus nonĩ difiyen. Ganan idi ĩ kobũ difen, dagi fara feledin.

7

Amuyē Sā Amuyē Ado
(Matyu 15:1-20)

¹ Farisia tamo, lo ifelnēdiya tamo tunĩ geid, Jerusalem temeleid disi guru de fen, Jesus salili difiyen. ² Idi lo difeid mog, in dõ fiya tar tunĩ amuyē ado imeid kulo fiya sã saaf don. ³ (Farisia tamo ado Juda tamo kayau ganan, saaf kaisã to dõdig. Idi imeid ket kulo difel fen, saaf dãf, ere nigin, idi mudur adodo biyeid neid tobonunã dõ difedig. ⁴ Idi maket bun tamal ke douf, idi saaf kaisã to dãf, idi imeid kulo de fen bagai. Idi tobonunã musei tunĩg dõ difedig, kap, darum, ketel kulo fiya age fiya.)

⁵ Anĩ nigin, Farisia tamo, lo ifelnēdiya tamo geid, Jesus to difiyen, “Ere nigin on dõ fiya tar, mudur adodo biyeid neid tobonunã to dõ de fen, amuyē ado imeid kulo fiya sã saaf dõdig?”

⁶ Jesus idi irokenēdin, “Asaia ĩ, ã mala yaleya tamo nigin wogõ yen, in od tutuk, are eig ye itoton:
 “Tamo kayau enidi neid sigoredim aya selu kulõ difedig, anĩ ere, idi waud aya nigin gerõ ifaref.

⁷ Idi aya yanau dalesedig, are ege.

Idi tamo nē lo dogol anĩ difelnēdidig.* ”

⁸ Jesus idi irokenēdin, “Ã Negur nē ĩtãfiya utorõg fen, tamo nē tobonunã anĩ urougef.”

* 7:7: Asaia 29:13

⁹ Age ye fen, ĩ idi irokenēdin, “Ā augeneĩ tobonunã dō fiya nigin ge fen, ã Negur nē ĩtãfiya anĩ weleĩ sirin inoya keleĩ bagai! ¹⁰ Ere nigin, Moses iron, ‘Ō sinã tamã yeneid wales,’† ‘Aibem taka sina tama ado yeneid sane inouf, ĩ laa bun dineyēf.’‡ ¹¹ Anĩ ere, ã urōgedig, tamo taka sina tama ado nigin irōf, ‘Ereb taka ã isenneiƳa nigin ayam ifeneiƳa, anĩ Koban’ (anĩ nē gariya, ‘ayam Negur afenem’), ¹² anĩ bunem, ã ĩ sina tama baban isennēdiya nigin katũ wiyēgedig. ¹³ Anĩ nigin, tubuĩ tar neid tobonunã anĩ waleg uroug fen, Negur nē od tadũ gedig. Agog fen, ã tobonunã fire fire musei ago gedig.”

¹⁴ Jesus baban tamo kayau iweignēdi di, wagen disi di, iron, “Ā adok aya karĩ wiyag, enei keleĩ youf. ¹⁵ Safina serē tamal tamo namen isilef anim, tamo amuyē to ifenēdig, anĩ ere, ereb taka tamo namenem wō yef anim, ĩ amuyē ifenēdig.”§

¹⁷ Jesus tamo kayau itorneid fen, fō bun ile di, in dō fiya tar, yaab od enĩ nigin ĩ to difiyen. ¹⁸ Jesus idi irokenēdin, “Āg fatuk nene gef de? Ereb taka serē tamal tamo namen isiledig anim, amuyē to ifenēdig anĩ, ã to ulegedig de? ¹⁹ Ere nigin, safina are tamo wau bun to iledig, anĩ ere, te namen isiledig, anenem bou dōf isil, ulō yesidig.” (Age ye iron anĩ bunem, Jesus kurō feis, saaf ganam amuyē sã yen.)

²⁰ ĩ od tobol fe fen, iron, “Ereb tamo namenem ulō yesef anim, ĩ amuyē ifenēdig. ²¹ Ere nigin, tamo waud bunem kisi sesen wō yef, noli tobonunã, bē, tamo yukesiya, seseirã inoya, ²² neu mugu yeya, tobonunã sesen, idegēya, noli kisi, kiyēĩ, ne tã bou yūya, aya aya yeya, neneya

† 7:10: Eksodas 20:12; Diuteronomi 5:16 ‡ 7:10: Eksodas 21:17;

Levitikas 20:9 § 7:15: Itotoya tunĩ eig de ditoton: ifenēdig. 16 Taka ĩ kariya nigin weder ado, ĩ karĩ youf.

tobonunã. ²³ Tobonunã sesen enei ganan, tamo namen tamal ulõ yesef anim, tamo amuyẽ ifenẽdig.”

*Sirofonisia Kayau Taka Nẽ Momoiya
(Matyu 15:21-28)*

²⁴ Jesus fonõ anĩ itor ken, Taia* teneub bun ilen. Ì fõ taka aaben ile fen, taka nem ì an ibodok yeya to keleĩ youf nigin wau iron. Anĩ ere, ì iminkel ibodõya nigin kisi feleya sã. ²⁵ Agef mog, kayau taka Jesus nigin od karĩ yen, ì, ne barai kaa sanem irounen anĩ isi fen, Jesus ye gariyan kubũ yen. ²⁶ Kayau anĩ ì Grik† kayau, ì Siria nediwon Fonia an sina gõ fen. Ì, kaa sane, ne barai bun tamal iruwauf nigin Jesus nonĩ fiyen.

²⁷ Jesus kayau irokenen, “Kesu nanaal idi ereb orodif anĩ, idi ket dãf, ere nigin, kesu nanaal neid bret yale, gaũ irarakenẽdiya, are to biya.”

²⁸ Kayau anĩ solof iron, “Odug, are momoi, anĩ ere, gaũ idig, tebol farumen kesu nanaal neid saaf momout kuku re di, dõdig.”

²⁹ Age ye di, Jesus kayau irokenen, “Ago solo urok nigin, õ ule, kaa sane, nẽ barai mogo itornem.”

³⁰ Age ye di, kayau fõ bun ilen, kaa sane, ne barai itornen anĩ, fatarẽ yen mog, ilen.

Jesus Tamo Taka Weder Sigor Ado Ifofakeleya El Fiyen

³¹ Jesus Taia teneub itor ken, Saidon teneub atu ilen, Dekapolis‡ teneub bun wõ ye fen, Galili maaĩwõ isilen.

³² An tamo kayau, tamo taka weder daabu leya tutuk wogõya kisi feleya sã anĩ, Jesus wagen dirou disin. Idi tamo anĩ bun, ima teten inouf nigin Jesus nonĩ difiyen.

* 7:24: Taia are taun taka. † 7:26: Grik, idi ibor fire, Juda sã. ‡ 7:31: Anĩ nẽ gariya, Ten Taun.

³³ Jesus, ï tamo kayau atun yale, firen irou ile fen, in ima gege, tamo anï nē weder kur inodin. Agef fen, Jesus salina ira ken, tamo anï nē bale kobū fen. ³⁴ Jesus saa ilun itad fen, si odug yale fen, ï irokenen, “Efata!” (anï nē gariya, “Fokō weid!”). ³⁵ Kaisā bagai, tamo nē weder fokō yedin, in bale karika le di, ï od atata fel wogō yen.

³⁶ Jesus, taka irokenēya nigin idi katū fiyēdin. Ì baba baban irokenēdin, anï ere, musei wogō def dilen. ³⁷ Tamo kayau idi odug biya terē de fen, idi diron, “Ì ereb ereb ganan biya dogol age fen. Ì age fe di, weder daabuya karī yef, sigor ifokeleya wogō yef.”

8

Jesus Fo Tausen Tamo Saaf Ifenēdin (Matyu 15:32-39)

¹ Sain anï bun, baban tamo kayau musei guru difen. Idi ereb taka yōya nigin san, anï nigin, Jesus in dō fiya tar ï garan iweig laisi fen, irokenēdin, ² “Aya tamo kayau enidi waud inaf, idi mogo aya geid, naa towo ereb taka yōya sã. ³ Aya idi naū ado fonō susur afouf are, idi luwen kuku douf, ere nigin, idi tunī egerō temeleid disin.”

⁴ In dō fiya tar aiten dale, Jesus dirokenen, “Gerere tuan eig fiya, taka nem bret kisi feleya nain yale fen, idi ifenēdiyof?”

⁵ Jesus to fedin, “Bret ganī ã ado?”
Idi diron, “Sewen dogol.”

⁶ Jesus tamo kayau tenebur dibodadāf nigin irokenēdin. Agef fen, Jesus bret sewen geif iroun, ï Negur de fiye ken, bret anï mumā feid fen, tamo kayau wagedin dinouf nigin, in dō fiya tar ifenēdi di, idi age difen. ⁷ Idi gau nanaaleg teke tekelei adon. Ì gau anidi nigineg Negur de fiye ken, idi gadō difediyof nigin in dō fiya tar irokenēdin. ⁸ Tamo

kayau don kisi felen. Dum in dō fiya tar, tamo kayau bret dokon, tunī ditoraran anī fito difen, karam sewen isokosen. ⁹Tamo fo tausen age fiya an difaren. Anī Jesus idi, nedi fonō fonō sur fedī di, ke de dilen. ¹⁰Agef fen, Jesus in dō fiya tar geid, waag bun sosō de fen, Dalmanuta distrik dilen.

Farisia Tamo Saa Ilun Nē Uris Nigin To Difen
(Matyu 16:1-4)

¹¹ Farisia tamo disī, Jesus kisi difiye ken, saa ilun nē uris dilouf nigin to difiyen. ¹²Ī si odug yale fen, iron, “Ere nigin tamo kayau sain enī bun difaref eneidi, uris nigin aya to difiyaf? Aya ā momoi arokeneik, uris taka idi to dalouf.” ¹³Age ye fen, ī idi itorneīd, waag bun kel sō ye, maaī sitakā ibal ilen.

Farisia Tamo Geid Herod Geneid Yis
(Matyu 16:5-12)

¹⁴ In dō fiya tar bret taka to dalen, wedereid tu kelen. Bret tekelei dogol waag bun idi adon. ¹⁵Jesus idi wedereid iron, “Ā, Farisia tamo geid Herod geneid yis nigin lo welegei.”

¹⁶ In dō fiya tar idi dogo dogol katō de fen, diron, “Ada bret sã nigin age yel.”

¹⁷ Idi neid wogōya Jesus kelei ken, idi to fedin, “Ere nigin ā bret to urougel nigin wogō gef? Ā fau ileya sã, wedereī fokōya sã de? Āgenei wauī total bagai lef de? ¹⁸Ā meleī ado, anī ere, ā to ulegedig de? Ā wedereī ado, anī ere, ā to karī gedig de? Ā to karī welegef de? ¹⁹Sain aya bret faif, faif tausen tamo nigin mumã afen, ā karam ganī bun, bret tunī kuru ge di, isokosen?”

Idi aiten dalen, “Karam tuwelf.”

²⁰ “Sain aya bret sewen, fo tausen tamo nigin mumã afen, ā karam ganī bun, bret tunī kuru ge di, isokosen?”

Idi aiten dalen, “Karam sewen.”

²¹ Jesus idi irokenēdin, “Ā fau to kisi fokō yef de?”

Tamo Taka Mala Ifofakeleya Oun Betsaida El Fiyen

²² Idi Betsaida disin. An tamo kayau tunī, tamo taka mala ifofakeleya diroule fen, Jesus imam kobū fiyēf nigin nonī difiyen. ²³ Jesus, tamo mala ifofakeleya ima yale, sibof, fonō dumeitur dilen. Agef fen, ī tamo mala bun salina ira ken, ima tamo mala bun ino fen, to fiyen, “Ere tau ulef?”

²⁴ Ī mala fara fel fen, iron, “Aya tamo kayau ailedif, idi aa gegen diyokesif.”

²⁵ Jesus baban in ima, tamo mala bun inon. Age fe di, tamo mala fara fele di, tutuk kelē yelen. Ereb ereb ganan ī yaor ileidin. ²⁶ Jesus tamo anī in fō bun sur fiye ken, irokenen, “Fonō atu to ulauf.”

Pita Kristus Nigin Kurō Fesin

(Matyu 16:13-20; Luk 9:18-21)

²⁷ Jesus in dō fiya tar geid, Sisaria Filipai nediwon fonō fonō diyok dilen. Naabur ī to fedin, “Tamo kayau idi, aya nigin ai dedig?”

²⁸ Idi diron, “Tunī dirok, Jon naan igunēdiya tamo; tunī dirok, Eliya; tunī dirok, profet anidi taka.”

²⁹ Jesus to fedin, “Ba ā uleg? Aya nigin ā ai gef?”

Pita aiten yale iron, “Ō anī Kristus.”

³⁰ Age ye di, Jesus ī nigin taka to dirokenēf nigin, idi wedereid iron.

Jesus In Laa Nigin Iron

(Matyu 16:21-28; Luk 9:22-27)

³¹ Age ye fen, Jesus gariya ino, idi ifelneid fen, irokenēdin, Tamo Naal ī, darau musei yale fen, mudur adodo, pris odudug, lo ifelnēdiya tamo idim dudum difiyēf. Age de fen, ī dukesi di, naa towo bure fele di, kel fā youf.

³² Jesus od anī kurō fesi di, Pita Jesus yale, yerin irou ile, ou fiyen.

³³ Age fe di, Jesus falei yel, in dō fiya tar lo feid fen, ī Pita ou fiyen. Ī iron, “Satan! Dumeun ule. On kisi are Negur nē sã, on kisi tamo nē dogol.”

³⁴ Age ye fen, Jesus, tamo kayau in dō fiya tar geid iweigneīd fen, irokenēdin, “Aib taka aya dō fiyau fenē, ī yogon oroya lai fesil fen, yogon aa tetek faali fe, aya dō fiyauf. ³⁵ Ere nigin, aib taka yogon bouwa buru mata ibodōf nigin oro fef, are fō yalauf, anī ere, aib taka yogon mata bouwa buru, aya nigin ado biya od nigin ye fen, irailauf, are kel yalouf. ³⁶ Tamo taka ī, teneub enī ganan kakarai fe, akorou ye fen, in malakanon irailauf, ere biya ī yalouf? ³⁷ Takag, tamo taka, yogon malakanon nigin ere mala solof fen, ī kel yalouf? ³⁸ Aib taka, seseirã inoya,* mosor inoya nē tamo kayau eneidi bun, aya nigin ado neu od nigin mama fouf are, sain Tamo Naal in engel fateul geid, Tama nē fula fiya medeīya ado disiyouf bun, ĩg ī nigin mama fouf.”

9

¹ Age ye fen, ī idi irokenēdin, “Aya ā momoi arokeneik, tunī ein difaref, fau to gare de mog, idi Negur nē tano* megeir ado isi mog, dilouf.”

Jesus Bouwa Falei Felen
(Matyu 17:1-13; Luk 9:28-36)

² Naa sigis bure fele di, Jesus, Pita, Jems, Jon anidi geif fen, idi mugu arei odug ilun diselen. An Jesus idi meleid bun bouwa falei felen. ³ In kolos lalau medeīya bagai, lalau

* **8:38:** Seseirã inoya, anī nē gariya ein, Negur fotokar waitou fire fire nigin momoiya. * **9:1:** Negur nē tano an, Negur yogo ereb ereb ganan lo fef.

anĩ tenebur ein taka nem kulo fe di, agef filiya kisi feleya sã. ⁴ Agef mog, an idi meleid bun, Moses Eliya ado wowã de fen, Jesus weim wogõ den.

⁵ Pita Jesus irokenen, “Rabi,† ada ein ibodõya nigin biya bagai. Ada salafat towo tanouf, taka ogon, taka Moses nẽ, taka Eliya nẽ.” ⁶ (Ĩ wogõya tata fen, ere nigin, idi fatuk bagai kumĩ den.)

⁷ Agef mog, lalo isi, idi kerub feid fen, ait taka lalo bunem wõ yen, “Eĩ neu Kesu, ĩ nigin aya wau laa fedig. ĩ karĩ wiyẽg!”

⁸ Kaisã bagai, idi fai den, aib taka to weim difar mog, dilen, Jesus dogol.

⁹ Idi arei nem diyok disi fen, Jesus ereb idi dilen anĩ, Tamo Naal laa bun tamal fau fãya sã mog, taka to dirokenẽf nigin, idi katũ fedin. ¹⁰ Idi od anĩ dogo bun dogol ibod ken, ‘laa bun tamal kel fãya’ anĩ nẽ gariya nigin katõ difen.

¹¹ Age de fen, idi Jesus to difiyen, “Ere nigin lo ifelnẽdiya tamo, ‘Eliya ĩ ket uyu isi di, Mesia isiyouf, dedig?”

¹² Jesus aitedin yalen, “Mmoi bagai, Eliya ket uyu isi fen, ereb ereb ganan madur fedif. Anĩ ere, ere nigin Tamo Naal ĩ darau musei yale fen, dudum difiyẽf anĩ, Negur nẽ Itotoya bun ibodok? ¹³ Anĩ ere, aya ã arokeneik, Eliya mogo isin, ĩ nigin Negur nẽ Itotoya bun yenek gen, ereb ereb ganan idi waud iron, ĩ nigin mogo age difen.”

Jesus Kesu Kaa Sane Ado El Fiyen

(Matyu 17:14-21; Luk 9:37-43)

¹⁴ Sain idi, in dõ fiya tar tunĩ ganan geredin disi fen, tamo kayau musei, idi salili difiyẽd fen, lo ifelnẽdiya tamo geid, od nem abob fe fe de mog, diledin. ¹⁵ Kaisã bagai,

† 9:5: Rabi, anĩ nẽ gariya, Juda neid tise.

tamo kayau ganan Jesus isi mog, dile fen, idi fatuk bagai terē den, aan difiyēf nigin gududu de dilen.

¹⁶ Jesus idi to fiyēdin, “Ā ere nigin idi geid, od nem abob fe fe gef?”

¹⁷ Guru fiya atun, tamo takam aiten yale iron, “Tise, aya neu kesu, ō gein arou asil, ī kaa sanem irou di, ait ifokelen.

¹⁸ Sain ganan kaa sanem irouf, ī yū irā di, tenebur kubū ye, sali mokuf, gobora kikokō ye fen, bouwa teregein yedig. Aya on dō fiya tar kaa sane diruwauf nigin to afedin, anī ere, idi kisi feleya sā.”

¹⁹ Jesus solof iron, “Tamo kayau eneidi momoiya sā, sain ganī aya ā geid tabodōf? Sain ganī aya ā nigin wau aukesilauf? Kesu wageun urousig.”

²⁰ Age ye di, idi kesu anī, ī garan dirou disi di, kaa sane Jesus ile fen, kaisā bagai kesu yū iran. Kesu ī tenebur kubū ye, wele yef, yen ken, awa bun sali moku fen.

²¹ Jesus kesu nē tama to fiyen, “Sain ganī ī eig fiya ibodon?”

Ī aiten yale iron, “Ī kesu naalun gariya inon. ²² Sain musei, ī yukesiyou fenē nigin yā bun ado naanū irādig. Anī ere, ō erēb taka age fiya nigin kisi feleyauf are, amā nigin waū ino ken, usennamā.”

²³ Jesus ī irokenen, “ ‘Ō kisi feleyauf, wof de? Taka ī momoi youf, erēb erēb ganan age fiya nigin kisi feleya.”

²⁴ Kaisā bagai, kesu nē tama iweig iron, “Aya momoi auf, neu momoiya naal nigin usenna!”

²⁵ Age ye di, tamo kayau gududu de disi mog, anī Jesus ileid fen, ī kaa sane ou fiyen. Ī iron, “Ō daabuya ait ifokeleya kaa, aya ō arokonok, ī bun tamal ulō weis fen, baban ī namen to kel ulauf.”

²⁶ Kaa anī ui ye fen, kesu yū irā di, fatuk bagai tererē ye mog, ulō yeis ilen. Lo difen, kesu laa gen yenē di, musei

diron, “Ī laa fel.” ²⁷ Anĩ ere, Jesus kesu anĩ ima irou fen, yalesnē di, ĩ ifaren.

²⁸ Jesus ĩ aaben ile ibod mog, in dō fiya tar mugun ĩ to difiyen, “Ere nigin amā kaa sane iruya nigin kisi feleya san?”

²⁹ Age de di, ĩ irokenēdin, “Eig fiya are, Negur kosē fiyēya[‡] bunem dogol iyawauf.”

Jesus Baban In Laa Nigin Iron

(Matyu 17:22, 23; Luk 9:43-45)

³⁰ Idi modoũ anĩ ditor ken, Galili distrik atu diyok dilen. Taka nem idi an yeya karĩya nigin, Jesus to oron, ³¹ ere nigin, ĩ in dō fiya tar ifelnēdin. ĩ idi irokenēdin, “Tamo Naal ĩ, fau kiwai tamo imeid bun dinouf. Idi fau ĩ dukesiyouf, naa towo bure fele di, ĩ fau kel fā youf.” ³² Anĩ ere, idi od enĩ nē gariya nene de fen, ĩ to fiya nigin kumĩ den.

Ai Anĩ Odug Bagai?

(Matyu 18:1-5; Luk 9:46-48)

³³ Idi Kapenaum taun disin. Jesus fō bun ibod ken, ĩ idi to fedin, “Ā naabur ere luwa urougel?” ³⁴ Anĩ ere, idi foro firi delen, ere nigin, naab luwen, aim anĩ idi atun odug bagai ibodok nigin luwa diroun.

³⁵ Jesus ibod ken, in dō fiya tar tuwelf iweig laisi fen, iron, “Taka ĩ uyu ifarau fenēf, ĩ gai dumen bagai youf. Agef fen, ĩ ganan neid kabĩ tamouf.”

³⁶ ĩ kesu naal taka yale iroule, idi atun ifarnen. ĩ imam yale koboi fiye ken, ĩ idi irokenēdin, ³⁷ “Aib taka aya yanau bunem, kesu naal eig fiya taka yalef are, ĩ aya yaleyaf. Aib taka ĩ aya yaleyaf are, ĩ aya dogol to yaleyaf, ĩ aya sur fiyan anĩg yalef.”

[‡] 9:29: Itotoya tunĩ eig de ditoton: kosē fiyēya ado kuriya.

Taka Ī Ada Nigin Kiwai To Inof, Are Neda
(Luk 9:49, 50)

³⁸ Jon iron, “Tise, tamo taka, ò yanã nem kaa sesen iruid mog, amã mailen. Anĩ nigin, amã ĩ katũ mafiyen, ere nigin, ĩ neda takam sã.”

³⁹ Anĩ ere, Jesus iron, “To katũ wiyẽg, taka ĩ neu yanau nem memelik inof are, ĩ kaisã bagai aya nigin sane irõya kisi feleya sã, ⁴⁰ ere nigin, taka ĩ ada nigin kiwai to inof, are neda. ⁴¹ Aya ã momoi arokeneik, taka ĩ, aya yanau nem, ã Kristus nẽ nigin ye fen, kap naan ado ifeneĩf are, ĩ in mala solo momoi bagai yalouf.

Mosor Bun Ineyẽf
(Matyu 18:6-9; Luk 17:1, 2)

⁴² “Aibem taka age fe di, kesu aya nigin momoi def enidi taka, mosor bun ineyẽf are, tamo anĩ meein odug guyutu bun ifo ken, maaĩwõ irãyam, are dem. ⁴³ Ogon imam mosor bun ineyõf, gudũ wol. Õ imã tobega ado, mata bun ileyã nigin biya bagai, ere nigin, ima totoũ adouf are, hel bun an yã faimud ibodkeleyan uleyã nigin. § ⁴⁵ Age fiya gen, ogon yẽ anim, mosor bun ineyõf, gudũ wol. Õ yẽ tobega ado mata bun ileyã nigin biya bagai, ere nigin, yẽ totoũ adouf are, hel bun dirãyoõf.* ⁴⁷ Takag, ogon malã anim, mosor bun ineyõf, ubodol uraile. Õ malã tekelei ado Negur nẽ tano bun ileyã nigin biya bagai, ere nigin, malã totoũ adouf are, hel bun dirãyoõf, ⁴⁸ an
“ ‘idi neid mamat to gare dedig,

yãg to gare feledig.’†

⁴⁹ Tamo ganã, yã tetedin sol gen tu difouf.

§ 9:43: Itotoya tunĩ eig de ditoton: nigin, 44 an idi neid mamat to gare dedig, yãg to gare feledig. * 9:45: Itotoya tunĩ eig de ditoton: dirãyoõf, 46 an idi neid mamat to gare dedig, yãg to gare feledig. † 9:48: Asaia 66:24

⁵⁰ “Sol ï biya, anĩ ere, in kai sa kalauf, naig wo di, baban kai youf? ã aug bun sol adouf, agog fen, abob nigin wau inosiya bun ubodögouf.”

10

*Tamo Kayau Ado Bagu Fiya Anĩ Fara Fiya
(Matyu 19:1-12; Luk 16:18)*

¹ Jesus modoũ anĩ itor ken, Judia distrik nẽ akor anĩ atu ile, Jordan naan sitakã ilen. Baban tamo kayau mala odug ï wagen disi di, ï gai age fedig gen, od ifelnẽdin.

² Farisia tamo tunĩ disi, kisi difiye ken, to difiyen, “Tamo taka yogon kayau iruf anĩ, are lo dõ fiya de?”

³ Ì aitedin yale iron, “Moses, anĩ nigin ere od wogõ yein?”

⁴ Idi diron, “Moses yo yen, are tamo bagu fiya anĩ fara fiya pepa itot fen, kayau od sã iru di, ilauf, yen.”

⁵ Jesus idi irokenẽdin, “Moses lo anĩ itotkenein, ere nigin, ãgenei wauĩ totol bagai agef yeneĩd. ⁶ Anĩ ere, gariya bun Negur ererb ererb ino fen, ‘tamo ino, kayau ino fen.’* ⁷ ‘Age fiya nigin, tamo ï in sina tama itorneĩd fen, in kayau ado bagu difouf, ⁸ age fe di, idi uruwom bouweid tekelei youf.† Age dife di, idi uru sã, idi tekelei. ⁹ Anĩ nigin, ererb Negur bagu fedin anĩ, tamom to fara fouf.”

¹⁰ Sain idi baban fõ bun dibod ken, in dõ fiya tar od enĩ nigin Jesus to difiyen. ¹¹ Jesus idi irokenẽdin, “Aib taka in kayau iru fen, kayau taka yalouf, ï kayau tubu morõ ifen ken, seseirã inouf. ¹² Age fiya bagai, kayau taka in aiwa itorne ken, tamo taka yalouf are, ï seseirã inouf.”

*Kesu Nanaal Jesus Geid
(Matyu 19:13-15; Luk 18:15-17)*

* **10:6:** Jenesis 1:27 † **10:8:** Jenesis 2:24

¹³ Tamo kayau, kesu nanaal Jesus wagen kobũ fediyouf nigin guri difeid disin, anĩ ere, in dõ fiya tar, idi ou difiyẽdin. ¹⁴ Jesus anĩ ile fen, wau sanen. Ì idi irokenẽdin, “Utornẽdig len, kesu nanaal aya wageun disiyouf, idi to katũ wedig, ere nigin, Negur nẽ tano are eig fediya neid. ¹⁵ Aya ã momoi arokeneik, aib taka ã, Negur nẽ tano kesu naal age fiya gen to yalouf are, ã namen to bagai ilauf.” ¹⁶ Age ye fen, ã kesu nanaal koboi feid fen, in ima tetedin ino fen, el fiya ifenẽdin.

Tamo Gaũ Safina Musei Ado

(Matyu 19:16-30; Luk 18:18-30)

¹⁷ Jesus mogo naab iyok ile mog, tamo taka ã garan gudu ref isel, wagen kubũ ye, ibor bobou fe fen, ã to fiyen, “Tise biya, aya ere naig afouf anĩ, mata faimud ibodkeleya alouf?”

¹⁸ Jesus ã irokenen, “Ere nigin õ aya anĩ biya wiyaf? Aibem taka biya sã, Negur yogo dogol. ¹⁹ Õ ãtãfiya keleĩ: ‘Õ tamo taka to ukesiyouf, õ to seseirã unouf, õ to bẽ walouf, õ taka nigin idegẽya od to urõf, õ idegẽya bunem safina to walouf, sinã tamã sigoreid dõ wouf.’[‡] ”

²⁰ Ì Jesus irokenen, “Tise, enei ganan, aya kesu naalun dõ afef asin.”

²¹ Jesus ã lof ile, ã nigin wau laaf fen, iron, “Tekelei anĩ õ inĩ sã. Ule, ogon safina ganan na nigin sur wo fen, maleg tamo weneĩd, agouf anĩ, õ saa ilun safina biya adouf. Ago wol fen, usi, aya dõ wiya.”

²² Od anĩ bunem, nawa kuru kele fen. Ì wau morõ ado ilen, ere nigin, ã safina musei ado.

²³ Jesus falei yel fen, in dõ fiya tar irokenẽdin, “Safina musei ado tamo, Negur nẽ tano bun ileyã nigin gai malai bagai!”

[‡] **10:19:** Eksodas 20:12-16; Diuteronomi 5:16-20

²⁴ In dō fiya tar, in od anī nigin terē den. Anī ere, Jesus baban iron, “Nau kesu tar, Negur nē tano bun ileyā nigin gai malai bagai! ²⁵ Kamel ī gabar iwaya nil ku bun ileyā nigin karika bagai, safina musei ado tamo Negur nē tano bun ileyā nigin malai bagai.”

²⁶ Od anī bun, in dō fiya tar fatuk bagai terē de fen, abob toti difen, “Age fiyauf are, aim anī mata ibodkeleya yaleya kisi feleya?”

²⁷ Jesus idi lo feid fen, iron, “Tamo bun are kisi feleya sã, anī ere, Negur bun kisi feleya. Ereb erēb ganān Negur bun kisi feleya.”

²⁸ Pita Jesus irokenen, “Amã erēb erēb ganān mator ken, ò dō mayok!”

²⁹ Jesus solof iron, “Aya ã momoi arokeneik, aib taka fõ, tura tar, main tar, sina, tama, gere tar be, kabī, aya nigin ado biya od nigin itoron, ³⁰ ī mala solo wan handred wal fiya, sain enī bun, (fõ, tura tar, main tar, sina tar, gere tar, kabī anidi ado morõg) yalouf, ī dumen isiyouf buneg mata faimud ibodkeleya yalouf. ³¹ Anī ere, musei malabag dibodok, idi dumen dibodõf; musei dumen dibodok, idi malabag dibodõf.”

*Jesus In Laa Nigin Irõ, Towo Fen
(Matyu 20:17-19; Luk 18:31-34)*

³² Jesus uyu irou fen, idi Jerusalem naab diselen. Age fe di, in dō fiya tar idi terē de mog, idi dō difedin anī kumī den. Baban Jesus in dō fiya tar tuwelf firen gou feid fen, ī fau bouwa bun ere wõ youf anī irokenēdin. ³³ Jesus iron, “Ada Jerusalem teselef, an Tamo Naal ī pris odudug, lo ifelnēdiya tamo imeid bun dinenēf. Idi ī laa foug nigin bouwa bun od dūf. Age de fen, idi ī haiden Juda sã anidi imeid bun dino di, ³⁴ idi ketē difiyēf, disisnēf, wagī difiye ken, dukesiyouf. Naa towo bure fele di, ī kel fã youf.”

*Jems Jon Ado Neid To Fiya
(Matyu 20:20-28)*

³⁵ Sebedi gere tar, Jems Jon ado, Jesus wagen disin. Idi diron, “Tise, amã ereb taka nigin to mafe di, õ agouf anĩ oromak.”

³⁶ Jesus idi irokenẽdin, “Ã ere anĩ, aya age afeneif nigin oroyeik?”

³⁷ Idi aiten dale diron, “Ogon fula fiya medeïya bun, amã taka ogon ima biyalẽ ibodõ di, taka ogon ima kilẽ ibodõf anĩ oromak.”

³⁸ Jesus idi irokenẽdin, “Ã ereb to gef anĩ nẽ gariya ã keleĩ sã, aya naan ãf anĩ, ã yõya kisi feleya de? Agef mã, naan aya agũf anĩ, ã igũya kisi feleya de?”

³⁹ Idi aiten dale diron, “Amã kisi feleya.” Age de di, Jesus idi irokenẽdin, “Naan aya ãf are, ã wãgauf, naan aya agũf are, ã ugũgouf, ⁴⁰ anĩ ere, imau biyalẽ ibodõya, kilẽ ibodõya are, ayam ifenẽya kisi feleya sã. Modou anidi are, idi nigin saika fen anidi neid.”

⁴¹ In dõ fiya tar ten od anĩ karĩ de fen, Jems Jon ado nigin seye den. ⁴² Jesus idi iweig laisi fen, iron, “Ã keleĩ, haiden neid uyu irouya def anĩ, tamo kayau lo fiya nigin total dinodig, idi dogo neid odudug, idi aruneid dalouf nigin megeir dinodig. ⁴³ Ã bun kisi to agef yenẽf, ã atun, aib taka odug ibodõf nigin orof, ã ãgenei kabĩ tamo ibodõf. ⁴⁴ Aib taka uyun ibodõf nigin orof, ã ganan neid ferfer ouf. ⁴⁵ Ere nigin, Tamo Naal ãg disennẽf nigin to isin, anĩ ere, ã tamo kayau isenneid fen, tamo kayau musei idi neid mosor anĩ fotokar, yogon mata ifenẽdiyof nigin isin.”

*Bartimeus Mala Ifofakelen Anĩ Mala Fara Felen
(Matyu 20:29-34; Luk 18:35-43)*

⁴⁶ Age de fen, idi Jeriko disin. Jesus, in dõ fiya tar, tamo kayau mala odug geid, taun anĩ ditor dile mã, tamo taka

mala ifofakeleya, Bartimeus (Timeus naal), ï naab yerin nonĩ yef ibodon. ⁴⁷ Sain ï Jesus Nasaret tamal yeya anĩ karĩ ye fen, ï iweig iron, “Jesus, Dawid Naal, aya nigin malalon yõ!”

⁴⁸ Age ye di, tamo musei sakã difiye ken, foro yalauf nigin dirokenen, anĩ ere, ï wade bagai iweig iron, “Dawid Naal, aya nigin malalon yõ!”

⁴⁹ Jesus dẽ yel fen, iron, “Uweignẽg.” Age ye di, idi tamo mala ifofakeleya diweignen, “Waũ el fe fen, fã wale! ï õ iweignok.” ⁵⁰ Age de di, ï yogon gabar sirilẽ iraille fen, fã yale, Jesus wagen isin.

⁵¹ Jesus ï to fiyen, “Aya õ ere age afonõf ani, õ oroyok?” Tamo mala ifofakeleya iron, “Rabi, aya kelẽ au fenẽ.”

⁵² Jesus iron, “Ule, ogon momoiya anim el yom.” Kaisã bagai, ï kelẽ yel fen, Jesus dõf, naab dilen.

11

Jesus Tamo Yana Ado Gen Jerusalem Namen Ilen
(Matyu 21:1-11; Luk 19:28-40; Jon 12:12-19)

¹ Idi Jerusalem kelẽ difiye ken, Moul Arei* bun Betfage Betani ado wõ den, Jesus in dõ fiya tar uru sur feid fen, ² ï idi irokenẽdin, “Fonõ wageik anĩ bun uleg, an wõg fen, donki naal difon anĩ ulogouf, are aibem taka anĩ bun to iyon. Anĩ biru weleg fen, ein urou usig. ³ Taka nem to yeif, ‘Ere nigin ã enĩ ago gef?’ youf are, urokenẽgouf, ‘Oduq orof nigin, fau mogo kaisã ein kel sur fouf.’ ”

⁴ Idi dile, donki naal naabur bobog ileyen difokelen ifar mog, fotou difen. Idi biru de mog, ⁵ tamo tunĩ an difaren anidim to difedin, “Ã ere naig gouf nigin, donki naal anĩ biru gef?” ⁶ Idi Jesus irokenẽdin kilei, solo de dirokenẽdin. Age de di, tamo ditornẽdi di, dilen. ⁷ Idi donki naal anĩ

* 11:1: ‘Oliv Arei’ dedig.

Jesus wagen dirousi fen, idi neid gabar teten dirarã di, ã anĩ teten ibodon. ⁸ Tamo kayau musei, idi neid gabar naabur du difedin, age de mog, tunĩ idi kabier aa were aarau ado kokour difedin anĩ du difedin. ⁹ Tamo kayau uyu dilen ado dume dõ difen, kakaĩ de diron,

“Hosiana!†”

“Odug yana bunem isif, are ã el fiyek!”‡

¹⁰ “Neda tamada Dawid nẽ tano isif, are el fiyek!”

“Hosiana, ilun bagai!”

¹¹ Jesus Jerusalem wõ ye fen, tempel ilen. ã erab erab ganan kii fedin, anĩ ere, sain bure felen nigin, ã in dõ fiya tar tuwelf geid Betani dilen.

Jesus Aa Fig Isisnen

(Matyu 21:18, 19)

¹² We fele di, idi Betani ditor dile fen, Jesus naũ fen. ¹³ ã mala ira kel, aa fig aarau ile fen, ã faat ado be ye mã, ilouf nigin ilen. ã non ilen, faat taka to ilen, aarau dogol, ere nigin, imaya sain sã. ¹⁴ Age fiya ile fen, ã aa irokenen, “Taka nem õ bun faat baban to yãf.” Agef irõ mog, in dõ fiya tar karĩ den.

Jesus Tempel Waĩ Fen

(Matyu 21:12-17; Luk 19:45-48; Jon 2:13-16)

¹⁵ Jerusalem wõ de fen, Jesus tempel modoũ namen ile, na dale dile disi dife mog, an irudidin. ã moni solo fediya[§] neid tebol ado, kuburir na nigin sur fediya neid bens eleg feledin. ¹⁶ Tamo ganan, tempel modoũ bun safina na nẽ

† 11:9: Anĩ nẽ gariya, ‘Usennamã!’ Od anĩ tamo kayau Negur yana yaleseya nigin wogõ dedig. ‡ 11:9: Sam 118:25, 26 § 11:15: Tempel takis inoya nigin, moni serẽ tamal ado tempel moni solo difedig.

iroulediya nigin katũ fiyēdin. ¹⁷ Agef fen, Jesus ifelneĩd iron,

“ ‘Neu fõ, teneub ganan nē kosēya fõ douf;’*
are Negur nē Itotoya bun to yenek de?

Anĩ ere, ã ‘bē tamo neid iminēya fõ’† unogen.”

¹⁸ Age ye di, pris odudug, lo ifelnēdiya tamo geid, od enĩ karĩ de fen, Jesus dukesiyouf nigin naab dimiren. Idi Jesus kumĩ difiyen, ere nigin, tamo kayau ganan in ifelnēdin anĩ nigin terē den.

¹⁹ Aragau di, idi taun anĩ ditor dilen.

Aa Fig Gariri Kelen

(Matyu 21:20-22)

²⁰ Bonimeidi idi naab diyok dile fen, idi aa fig warei bunem gariri kelen anĩ dilen. ²¹ Pita weder fokõ yel fen, Jesus irokenen, “Rabi, ulef! Õ aa fig usisin, are gariri kelen!”

²² Age ye di, Jesus solof irokenēdin, “Negur bun momoi wogei. ²³ Aya ã momoi arokeneik, aibem taka arei enĩ irokenēf, ‘Õ kusu urã, maaĩwõ usil,’ age ye fen, ã wau to uru fen, momoi aya orok anĩ agef wõ youf, youf are, agef dõ fenēf. ²⁴ Anĩ nigin, aya ã arokeneik, ereb taka nigin ã kosē bun tog fen, mogo malel ge, momoi gouf, are āgenei youf. ²⁵ Sain ã ufareg kosēg fen, ã takan nē sane nigin wauĩ bun yenēf are, wedereĩ tu kalauf. Ago ge di, āgenei Temeĩ saa tanon ibodok, āgenei mosor nigin weder tu kalauf.”‡

Jesus Aim Igirnen Anĩ To Difiyen

(Matyu 21:23-27; Luk 20:1-8)

* 11:17: Asaia 56:7 † 11:17: Jeremaia 7:11 ‡ 11:25: Itotoya tunĩ eig de ditoton: kalauf. 26 ã wedereĩ to tu kalauf are, āgenei Temeĩ saa tanon ibodok ig, āgenei mosor nigin weder to tu kalauf.

²⁷ Idi baban Jerusalem wõ den, Jesus tempel fofomalan iyok ile mog, pris odudug, lo ifelnēdiya tamo, mudur adodo geid, ï wagen disin. ²⁸ Idi Jesus to difiyen, “Ere igiriya bunem, õ ereb ereb enĩ ago wof? Aim õ enĩ agouf nigin igirnon?”

²⁹ Jesus aitedin yale iron, “Aya to fiya tekelei afeneif. Solog urokanage di, ereb igiriya bunem ereb ereb enĩ age afef anĩ, aya ã arokeneif. ³⁰ Jon naan igunēdin, are saa ilun tamal de, tamo bunem? Urokanag!”

³¹ Idi dogo dogol katõ de fen, diron, “Ada, ‘Saa ilun tamal,’ tauf, ï to fouf, ‘Age fe di, ere nigin, ã ï nigin to momoi gen?’ ³² Anĩ ere, ada, ‘Tamo bunem,’ tauf...” (Idi tamo kayau kumĩ difedin, ere nigin, tamo ganan, Jon ï momoi bagai profet den.)

³³ Anĩ nigin, idi Jesus ait solo de diron, “Amã keleĩ sã.”

Age de di, Jesus iron, “Ayag ã to arokeneif, ereb igiriya bunem aya ereb ereb enĩ age afedif.”

12

Tamo Kabĩ Lo Difedig Nē Yaab Od (*Matyu 21:33-46; Luk 20:9-19*)

¹ Age ye fen, Jesus yaab od nem idi irokenēdin, “Tamo taka wain kabĩ yalen. Ï kau ifõ kalĩ felen, wain sumin asi fiya nigin ku yalen, kabĩ lo fiya tamo neid fõ inon. Agef fen, ï mala solo yalouf nigin wain kabĩ, kabĩ tamo tunĩ imeid bun ino fen, uyu takã ilen. ² Fito fiya sain, ï, kabĩ tamo taka, wain kabĩ lo fiya tamo gedin, wain biya tunĩ, idi bun gei fouf nigin sur fen. ³ Anĩ ere, idi ï dale, du ken, sur difiyē di, ima sã sã ilen. ⁴ Age dife di, ï kabĩ tamo taka idi gedin sur fen. Idi tamo anĩ mudur bun du ken, mama difenē di, ilen. ⁵ Ï baban takag sur fen, areg idi dukesin.

Ī musei tunīg sur fedin, age fe di, tunī diden ken, tunī didenkesin.

⁶ “Ī gama tekelei dogol sur fiya nigin ibodon, are yogo naal, ĩ yogon oboi bagai. Ī anī dumen bagai sur fiye ken, iron, ‘Idi neu kesu anī karī difiyēf.’

⁷ “Anī ere, kabī lo fiya tamo, idi abob dirokenen, ‘Eī ĩ akorouf. Usig, ada ĩ tau keis fen, akor eī nedauf.’ ⁸ Anī nigin, idi ĩ dale, dukeis fen, wain kabī dumeitur diran.

⁹ “Age dife di, wain kabī marau naig fouf? Ī isi, kabī lo fiya tamo idenkeis fen, wain kabī anī tamo tunī ifenēdiyof. ¹⁰ Ā Negur nē Itotoya enī to uwesegen de?

“‘Meein are fō inoya tamom sane de fen, ditoron, meein anī gama monog tor wō yen,

¹¹ anī Odug yogo age fe di, malamā yū yalen.* ”

¹² Age ye di, pris odudug, lo ifelnēdiya tamo, mudur adodo geid, Jesus irounēya nigin naab dimiren, ere nigin, idi kelein, ĩ idi nigin yaab od wogō yen. Anī ere, idi tamo kayau nigin kumī de fen, idi ĩ ditornē dilen.

Sisa Takis Ifenēya

(Matyu 22:15-22; Luk 20:20-26)

¹³ Dum idi, Farisia tamo tunī, Herod nē tamo tunī geid, Jesus garan in od bun kū fenē di, dirounēf nigin sur difedin. ¹⁴ Idi ĩ garan disi fen, diron, “Tise, amā keleī, ō momoi wogōya nē tamo. Ō tamom to wewu diyōdig, ere nigin, ō idi yeneid ado be, sã anī to es wedidig. Ago fen,

ō momoi bagai Negur nē naab ufelnamādīg. Sisa[†] takis ifenēya nigin biya de, sã? ¹⁵ Amā mafenēf de, sã?”

Anī ere, Jesus idi neid namedin kisi sane kelei ken, iron, “Ere nigin ã aya nigin kor unogef? Koin moni taka urousig

* **12:11:** Sam 118:22, 23 † **12:14:** Rom neid king odug.

len, aya ailau fenē.” ¹⁶ Idi koin moni taka dirousi di, ī idi to fedin, “Eī ai nē malakanon? Eī ai yana nē itotoya?”

Idi aiten dale diron, “Sisa nē.”

¹⁷ Age de di, Jesus idi irokenēdin, “Sisa nē are Sisa wenēg, Negur nē are Negur wenēg.”

Age ye di, idi ī nigin terē den.

Kel Fāya Bun Ai Nē Kayau Ibodōf
(*Matyu 22:23-33; Luk 20:27-40*)

¹⁸ Sadusia tamo idi dirōdig, laa bun tamal to ke de fā dedig anī, Jesus wagen disī to difiyen. ¹⁹ Idi diron, “Tise, Moses itotkanaman, are tamo taka laaf fen, aiwa itornen, anī ere, kesu sā, tamo ī waab anī yale fen, tura nē kesu diroukenēf. ²⁰ Gama tura tura sewen dibodon. Matu ketem kayau yalen, anī ere, kesu yaleya sā mog, laa fen. ²¹ Matu dō fiya bagam waab anī yalen, anī ere, īg kesu sā mog, laa fen. Idi dō fediyag de age fen. ²² Tura tura sewen anidi adok, kesu taka to dalen. Dum kayau areg laa fen. ²³ Dum laa bun tamal kel fāya sain bun, ī ai nē kayau ibodōf, ere nigin, tura tura sewen anidi adok, ī dale dogolen?”

²⁴ Jesus aitedin yale irokenēdin, “Ā od kū wenēgef, ere nigin, ā Negur nē Itotoya ado Negur nē megeir keleī sā.

²⁵ Sain laa bun tamal kel fāya bun, an tamo kayau ado abob yalef ya sāf, idi engel saa ilun dibodok gen dibodōf.

²⁶ Gama, laa bun tamal fāya nigin, Moses nē od Negur nē Itotoya bun ibodok, are arein aa mata bun fotou fiyen Negur ī naig fe irokenen, ‘Aya Abraham nē Negur, Isak nē Negur, Jakop nē Negur’[‡] anī to be uwesegen de? ²⁷ Ī laa neid Negur sā, anī ere, ī mata ibodōya neid. Ā fatuk bagai kū wenēgef!”

[‡] 12:26: Eksodas 3:6

*Ītāfiya Odug Bagai Ganan Wal Fiya
(Matyu 22:34-40; Luk 10:25-28)*

²⁸ Lo ifelnēdiya tamo taka isi, idi od nem kusī de mog, karī fiyēdin. Jesus ĩ aiten, od biya irokeneīd mog, karī ye fen, ĩ Jesus to fiyen, “Ītāfiya ganan bun, ĩtāfiya nanī anī ganan wal fiya?”

²⁹ Jesus iron, “Ītāfiya ganan wal fiya are enī, ‘O Israel, karī wog, Odug neda Negur, Odug ĩ yogo tekelei. ³⁰ Ō, Odug ogon Negur ĩ nigin waū adok, malākanon adok, kisi adok, megeir adok bunem, ĩ nigin waū laaf.’[§] ³¹ Anī dō fiya are eig fiya, ‘Ō ogo nigin waū laa fef gen, nē tā nigineg ago waū laaf.’* Ītāfiya uru enim, ganan wal fiya.”

³² Lo ifelnēdiya tamo anī Jesus irokenen, “Tise, ō de urok. Negur ĩ tekelei, taka to ibodok, Negur yogo dogol wof, anī bun momoi urok. ³³ Ō Negur nigin waū adok, kisi adok, megeir adok bunem waū laaf fen, ō ogo nigin waū laa fef gen, nē tā nigineg ago waū laafei yeya anim, yā bun sesewi fiya ado sesewi fiya fire fire ganan wal fiya.”

³⁴ Jesus tamo anī keleī ado aiten yale di, ile fen, Jesus ĩ irokenen, “Ō Negur nē tano nigin egerō sā.” Sain anī bunem ilen, taka nem baban to fiyēya nigin kumī den.

*Ai Nē Kesu Anī Kristus?
(Matyu 22:41-46; Luk 20:41-44)*

³⁵ Jesus tempel modoū bun ifelneīd fen, ĩ to fedin, “Naig fe di, lo ifelnēdiya tamo, Kristus ĩ Dawid nē naal dedig?”

³⁶ Dawid ĩ yogo Awa Uur Fateul bunem wogō ye fen, kurō falaisin:

“‘Negur, neu Odug irokenen,
“Imau biya melem ubod mog,
ogon kiwai tar
on yē farumē gō afalauf.” ’

§ 12:30: Diuteronomi 6:4, 5 * 12:31: Levitikas 19:18

³⁷ Dawid yogo, ï nigin ‘Odug’ yef, naig fe di, ï Dawid naal ouf?”

Tamo kayau musei waud el fiya ado karï difiyen.

³⁸ Jesus ifelneïd fen, iron, “Lo ifelnēdiya tamo nigin lo welegei. Idi gabar meluluk difonunakel diyo ken, maket modoũ bun aan difiyēdiyof anï orodidig. ³⁹ Age de fen, idi Juda neid uub fõ bun, sia biyai biyai bun dibod ken, tar inoya bun modoũ malabag bun dibodõdig. ⁴⁰ Idi, kayau waab idegnēdiya bunem nedi fõ sosoïn de fen, meleid yaleya nigin meluk bagai kosē dedig. Tamo age fediya, mala solo sane bagai dalouf.”

Kayau Waab Nē Ofa

(Luk 21:1-4)

⁴¹ Jesus ofa moni bogis sitakā ibod ken, tamo kayau lo feid mog, idi moni tempel bogis bun dinon. Tamo kayau safineid adodo musei moni odudug diraran. ⁴² Anï ere, kayau waab maleg taka isi, kapa koin moni giriya nanaal bagai uru inon. Are tu toea dogol.

⁴³ Jesus in dõ fiya tar iweig laisi fen, irokenēdin, “Aya ã momoi arokeneik, kayau waab maleg enï ï, ganan wal fediya, odug bagai bogis bun inol. ⁴⁴ Idi ganan dogo neid safineid bun tamal tunï dinon, anï ere, kayau maleg anï, ereb ereb adok ï isennēf anï ganan inon.”

13

Idikeleya Sain Nē Uris

(Matyu 24:1-35; Luk 21:5-33)

¹ Jesus ï tempel bunem kutũ yeis mog, in dõ fiya tar taka ï irokenen, “Ule, Tise! Ere meein odudug oug fediya! Ere fõ meli meli oug fediya!”

² Age ye di, Jesus ĩ irokenen, “Fõ odudug enĩ ganan uledif de? Meein enĩ taka to abob teten yenēf, anĩ adok fau isog irailauf.”

³ Jesus Moul Arein tempel sitakā ibod mog, Pita, Jems, Jon, Endru anidim mugun Jesus to difiyen, ⁴“Ere sain enidi wõ youf? Ere uris bagai anĩ, enĩ ganan kisi falauf nigin wõ youf? Anĩ urokanamã.”

⁵ Jesus idi irokenēdin, “Takam idegneīya nigin lo weleg. ⁶Musei aya yanau nem disi dirōf, ‘Aya Kristus,’ age de fen, musei didegnēdiyof. ⁷Sain ā kusĩ nigin karīg fen, tamo sigoredim kusĩ nigin wogõ douf anĩ karĩ gouf, ā to tererē gei. Ereb ereb anidi agef wõ youf, anĩ ere, idikeleya sain fau dum isiyof. ⁸Teneub taka fã ye fen, ĩ teneub taka nigin kiwai ifenēf, tano taka ĩ, tano taka nigin kiwai ifenēf. Uyu taka taka bun mimĩ wõ ye fen, naũ isiyof. Age fouf anĩ, kayau kesu gõ fouf nigin darau gariya inodig age fiya.

⁹ “Ā aug nigin lo weleg. Ā fau kaunsel imeid bun dinenei ken, uub fõ bun wagagã diyeif. Aya yanau nigin, ā gawaman mudur, king geid meleid bun ufareg fen, idi kurõ walaisig urokenēdigouf. ¹⁰Biya od ketem teneub ganau bun iyokalauf. ¹¹Sain ā gei diyei ken, kot bun dirouleyeif, ere mauf wog fen, to kisi musei waleg. Sain anĩ bun, ereb ifeneik anĩ wogõ gouf, ere nigin, are āgem to wogõ gouf, are Awa Uur Fateulem.

¹² “Turam, tura kiwai imeid bun ino di, dukesiyof, age fe di, tamam in kesu age fouf. Kesum sina tama kiwai difeneid fen, laa bun dinenēdiyof. ¹³Tamo ganau aya nigin ā kiwai difeneif, anĩ ere, taka ĩ megeir ifaref ile ile idikeleyanouf, Negur ĩ yalouf.

¹⁴ “Sain ‘ninin anĩ fonou inouf nigin’* ĩ an to ifarau nē anĩ ulogouf (anĩ uweseg, keleĩ youf), idi Judia distrik bun

* **13:14:** Daniel 9:27; 11:31; 12:11

dibodok, arein diya diselauf. ¹⁵ Taka ï yogon fõ agaran ibodok, ï kutũ yeis, aaben ile, ereb ereb to yalouf. ¹⁶ Taka ï kabier ibodok, yogon gabar yalouf nigin to kel ilauf. ¹⁷ Naa anĩ bun, kayau bouweid ado, kayau kesu su difenēdif ado, idi meleidlon ado! ¹⁸ Feluk sain bun, anĩ to wõ youf nigin, ã Negur kosē wiyēgouf, ¹⁹ ere nigin, naa anidi bun morõ odug biya adouf, morõ age fiya, gariya bun Negur teneub inon bunem isi gama, taka to wõ yen, dum buneg taka to wõ youf. ²⁰ Odug morõ odug nē naa anĩ to guru falaisim, taka to ibodom. Anĩ ere, tamo kayau ï igirnēdin nigin, ï naa anĩ guru falaisin. ²¹ Sain anĩ bun, taka ã irokeneif, ‘Ulegef, Kristus yeir!’ oo ‘Ï your!’ ã anĩ to momoi ge. ²² Fau idegēya Kristus, idegēya profet ado, wõ de fen, idi kisi falauf are, Negur igirnēdin anidi didegnēdiyof nigin uris memelik ado dinodiyof. ²³ Anĩ nigin, lo welegei, sain anĩ fau mog, aya ã ereb ereb ganan arokenein.

²⁴ “Anĩ ere, naa anidi bun, morõ anĩ dõ fiya,

“ ‘gaa gugum kalauf,

age fe di, ogõ lalan to ifenēf,

²⁵ saa ilun tamal barisa kuku rouf,

saa nē megeir ganan guyoyõ douf.†

²⁶ “Sain anĩ bun, tamo idi, Tamo Naal lalo bun yogon megeir odug fula fiya medeīya ado isi mog, dilouf. ²⁷ Agef fen, ï yogon engel susur fedi di, yogon tamo kayau igirnēdin anidi, teneub akor ganan bun, gaa iseya nem ile gaa ileyan, gei de, kuru difediyof.

²⁸ “Gama ã, aa fig bun keleĩ walogouf. Susu bonuf fen, aarau inodif, ã keleĩ, saneya melsak. ²⁹ Age fiya gen, ã ereb ereb anĩ wõ youf ulogouf, ã keleĩ, are mogo melsā bagai bobogē ifaref. ³⁰ Aya ã momoi arokeneik, tamo kayau sain enĩ bun dibodok eneidi to gare de mog, enĩ ganan wõ youf.

† 13:25: Asaia 13:10; 34:4

³¹ Saa teneub ado sa kalauf, anĩ ere, neu od to bagai sa kalauf.

Naa Sain Ado Takam To Keleĩ Youf

(Matyu 24:36-44)

³² “Taka nem naa sain ado to keleĩ youf, saa ilun engel idig sã, Naal ïg sã, Dei yogo dogol. ³³ Mata ubodög fen, lo weleg! Ereb sain anĩ wõ youf, ã to keleĩ youf. ³⁴ Are tamo fõ itor ileyã gen. Ì yogon fõ itor ken, lo difouf nigin yogon ferfer imeid bun inon, idi mugu mugu kabĩ fire fire ifenēdin. Agef fen, ï tamo bobog bun anĩ mala inof ibodõf nigin irokenen.

³⁵ “Anĩ nigin, mata ubodög fen, lo welegei, ere nigin, ã keleĩ sã, ereb sain fõ marau kel isiyouf, aragau be, bõ atun be, tataro yũ mog be, wef mog be. ³⁶ Ì isi tarabã yeif, ã to wenēg mog, ileyēif, are deuf. ³⁷ Ereb aya ã arokeneik, aya adok ganã arokenēdif, ‘Lo weleg!’ ”

14

Kayau Taka Betani An Jesus Mudur Bun Moul Fi Felen

(Matyu 26:1-16; Luk 22:1-6; Jon 11:45-53; 12:1-8)

¹ Gama Pasa naa ado Bret Yis Sã Sifa naa, fau uru yen mog, pris odudug, lo ifelnēdiya tamo geid, Jesus idegēya naab bun dale dirou fen, dukesiyouf nigin naab dimiren.

² Idi diron, “Sifa sain bun to age tafouf, age tafouf are, tamo kayau seye de fen, kusĩ dalesauf.”

³ Jesus Betani an, Simon kulu lepra dagi adon tamo, in fõ bun saaf yoko ibod mog, kayau taka ï wagen moul sumeĩ biya bagai moni odug nem, nad* nem dogol dinon anĩ, gulub† ado irou isin. Agef fen, kayau gulub anĩ karãf fen, Jesus mudur bun moul fi felen.

* **14:3:** Fisir yana, fisir anĩ warumutei bun moul daledig. † **14:3:** Meein alabasta nem dinon.

⁴ Age fe di, tunĩ an difaren are waud sane fen, abob dirokenen, “Ere nigin moule enĩ sekiel fef? ⁵ Moule enei yar tekelei nē dimig mala wal feseya nem sur fiam, agef fen, moni anĩ yale, maleg tamo ifenēdiyam, are dem.” Age de fen, idi ĩ total bagai ou difiyen.

⁶ Jesus iron, “Utornēg, ā ere nigin ĩ wau morō wenēgef? Kayau enĩ aya nigin biya bagai age fel. ⁷ Maleg idi faimud ā geid ubodōgouf, anĩ nigin, ā idi isennēdiya oroyeĩf, are sain musei. Anĩ ere, aya faimud ā geid to tabodōgouf. ⁸ ĩ ereb age fiya kisin anĩ age fel. ĩ moule aya bouwau bun fi felel are, mekur ainēf nigin anĩ ketem dodok fel. ⁹ Aya ā momoi arokeneik, tenebur ein nain be, biya od enĩ wogō douf, ereb kayau enĩ age fel anĩg wogō douf. Age fe di, idi ĩ nigin kisi difouf.”

¹⁰ Age ye di, Judas Iskariot, tuwelf anidi atun taka, Jesus kiwai ifen ken, pris odudug imeid bun inouf nigin wagedin ilen. ¹¹ Pris odudug idi od enĩ karĩ de, waud al fe fen, ĩ moni difenēf nigin dirokenen. Anĩ nigin, ĩ Jesus idi imeid bun inouf nigin naab imirek ilen.

Odug Nē Saaf

(Matyu 26:17-30; Luk 22:7-23; Jon 13:21-30; 1 Korin 11:23-25)

¹² Bret Yis Sā Sifa inoya naa matu anĩ bun, sain anĩ are idi neid tobonunā, sipsip naal, Negur tubuid tar isennēdin anĩ kisi de fen, sesewi difedig anĩ, Jesus nē dō fiya tar Jesus to difiyen, “Ō amā nain anĩ Pasa naa nē saaf wāf nigin, amā dodok mafouf anĩ oroyok?”

¹³ Age de di, Jesus in dō fiya tar uru sur feid fen, irokenēdin, “Taun uleg fen, tamo taka darum naan ado isi fotou yeĩf, ĩ dō gouf. ¹⁴ ĩ fō taka namen ile di, uleg fen, gama ā fō marau eig wiyēg urokenēgouf, “Tise to fel: Aya neu dō fiya tar geid, Pasa naa nē saaf māf nigin aab nain

ibodok? ¹⁵ Ī aab odug ilun anī ifelneīf, an ereb ereb dodok de bure difelen. An neda nigin dodok gouf.”

¹⁶ In dō fiya tar taun dile fen, Jesus iron kilei, ereb ereb age fiya dilen. Anī nigin, idi Pasa naa nē saaf dodok difen.

¹⁷ Aragau di, Jesus in dō fiya tar tuwelf geid, an wō den. ¹⁸ Idi tebol bun si dino, saaf dokon, Jesus iron, “Aya ā momoi arokeneik, ā atun takam aya kiwai imeid bun inoyauf, taka aya uruwom moko anim.”

¹⁹ Idi waud gudūf fen, mugu mugu dirokenen, “Momoi bagai, ayam sã de?”

²⁰ Jesus aitedin yale iron, “Ā tuwelf atun takam, taka ĩ, imamã uruwom beī bun nu mafef anim. ²¹ Tamo Naal ĩ nigin ditoton agef bai ilauf. Anī ere, tamo ĩ Tamo Naal kiwai tamo imeid bun inof, ĩ malalon ado! ĩ sina to gō fem, are dem.”

²² Idi saaf dokon, Jesus bret yale, Negur de fiye ken, bret anī mumã fen. Agef fen, in dō fiya tar ifeneīd fen, iron, “Waleg, eī neu bouwau.”

²³ Agef fen, ĩ kap yale, Negur de fiye ken, kap anī ifenēdin, age fe di, idi adok anī bun don.

²⁴ Jesus idi irokenēdin, “Eī neu naudou, ā Negur geid bar itenēya nigin, are tamo kayau musei nigin fi felef, ²⁵ aya ā momoi arokeneik, aya baban wain enī to āf, gaman ile, aya Negur nē tano bun wain mata āf bun.”

²⁶ Idi seg taka dalel fen, idi Moul Arei bun diselen.

Pitam Jesus Wa Fiyēf Nigin Jesus Iron

(Matyu 26:31-35; Luk 22:31-34; Jon 13:36-38)

²⁷ Jesus idi irokenēdin, “Ā fau adok uyalalagauf, ere nigin, Negur nē Itotoya eig ye irok:

“‘Aya sipsip marau aū di,
sipsip ganan firagagaū difouf.’

²⁸ Anī ere, aya kel fã auf bun, aya ket Galili uyu alaaf.”

²⁹ Pita Jesus irokenen, “Ganan diyalalaufeg, aya sãf.”

³⁰ Jesus Pita irokenen, “Aya õ momoi arokonok, gama bõ enĩ bun, tataro kokorok ye uru fiya sã mog, õ ogo aya nigin wa wo, towo wouf.”

³¹ Anĩ ere, Pita total bagai iron, “Momoi aya õ uruwom gare tauf nigin oufeg, aya õ nigin to bagai wa afouf.” Age ye di, idig ganan od de tekelei anĩ diron.

Getsemane Oun

(*Matyu 26:36-46; Luk 22:39-46*)

³² Idi modoũ yana Getsemane dedig, an dilen. Age de fen, Jesus in dõ fiya tar irokenẽdin, “Ein ubodõg mog, aya kosẽ auf.” ³³ Ĩ, Pita, Jems, Jon anidi dogol geif fen, ĩ geid dilen. Agef fen, ĩ wau gũf fen, morõ odug gudũ fen. ³⁴ Jesus idi irokenẽdin, “Neu malaukanon tobega le fen, wau morõ gudũ feis, laa nẽ daũ bun ifaref. Ein ufareg fen, lo weleg.”

³⁵ Naal godof iroule fen, kisi falauf are, sain anĩ Jesus wal fiyẽf nigin, ĩ tenebur kubũ ye fen, kosẽ yen. ³⁶ Jesus iron, “Aba, † Dei, erab erab ganan, õ age fiya kisi feleya. Kap enĩ walelkana. Anĩ ere, neu oroya anĩ to dõ wo, on oroya dõ wo.”

³⁷ Age fel fen, Jesus in dõ fiya tar gedin kel isin, mulã den mog, iledin. Jesus Pita irokenen, “Simon, õ wenek de? Õ aua tekelei to mata ubodõf de? ³⁸ Ą, kisi yeĩya bun to kubũ gouf nigin lo weleg fen, kosẽ gouf. Uur are orof, anĩ ere, bouwa anĩ malegef.”

³⁹ Ĩ baban kel ile, uruwa kosẽ yen gen, dõf age fen. ⁴⁰ Ĩ kel isin, baban denena mog, iledin, ere nigin, idi meleid morõ gudũ fesin. Idi ĩ erab fiyẽya nigin taka to kisi difen.

⁴¹ Jesus kel towo fe fen, in dõ fiya tar irokenẽdin, “Ą fau si unog fen, yenẽyai gef? Bure! Sain mogo isil. Ulegef,

† 14:36: Anĩ nẽ gariya, Aram od bun ‘Dei.’

Tamo Naal mogo mosor tamo imeid bun ilef. ⁴² Fafåg fen, teleg! Kiwai imeid bun inoya tamo yeir isif!”

Jesus Dirounen

(Matyu 26:47-56; Luk 22:47-53; Jon 18:3-12)

⁴³ Jesus fau wogō ye mog, tuwelf anidi atun taka, Judas wō yen. Tamo musei dimig adodo, seburer adodo, ī geid disin. Pris odudug, lo ifelnēdiya tamo, mudur adodo idim sur difedi di, disin.

⁴⁴ Gama Judas ī Jesus yaor fiyēya nē uris nigin, idi faded fiyēdin: “Tamo aya umā afouf anī, ī waleg fen, uroug uleg.” ⁴⁵ Judas kaisā bagai Jesus wagen ile iron, “Rabi!” Agef fen, umā fiyen. ⁴⁶ Tamo idi Jesus ka dife dirounen. ⁴⁷ Age dife di, tamo melsā difaren anī takam dimig ul feis yale, pris mudur ado nē kabī tamo weder salōf iran.

⁴⁸ Jesus iron, “Aya bē tamo gen, ā dimig adodo, seburer adodo, waleyagau fenē usigef de? ⁴⁹ Naa ganan, aya ā geid tabod ken, tempel fofomala bun afelnein, anī ā aya to urouyagen. Anī ere, Negur nē Itotoya bun ibodok anī kisi falauf nigin.” ⁵⁰ Age ye di, ganan ditornē diyalelen.

⁵¹ Tamo gaū taka, gabar lalau dogol ifonun ī, Jesus dō fen. Sain idi Jesus ka dife di, ⁵² ī gabar inū iraile, gemū iyawon.

Jesus Juda Kaunsel Neid Kot Mala Bun Ifaren

(Matyu 26:57-68; Luk 22:54, 55, 63-71; Jon 18:13, 14, 19-24)

⁵³ Idi Jesus dale, pris mudur ado wagen diroulen. Age dife di, pris odudug, mudur adodo, lo ifelnēdiya tamo geid, ganan disi guru difen. ⁵⁴ Pita Jesus dume dōf, tokō fel ile, pris mudur ado nē fō fofomalan wō yen. An ī kabī tamo geid dibod ken, yā imidirek ibodon.

⁵⁵ Pris odudug, kaunsel ganan geid, Jesus laa bun dinenēf nigin bouwa bun od dimiren. Anī ere, taka to

dilen. ⁵⁶ Musei Jesus bouwa bun idegēya od diraran, anī ere, idi neid od tekelei sã.

⁵⁷ Age de fen, tamo tunī fafã de fen, Jesus bouwa bun idegēya od enī diran, ⁵⁸ “Amã karī mafiyē mog, iron, ‘Aya tempel tamom dinon anī narī afel fen, naa towo bun, taka, are tamom to inouf anī anouf.’ ” ⁵⁹ Anī ere, idi neid od anīg tekelei sã.

⁶⁰ Age de di, pris mudur ado wagedin fã ye ifar fen, Jesus to fiyen, “Õ to solo urōf de? Eĩ ere od anī tamo enidi dirousi, õ boũ bun duk?” ⁶¹ Anī ere, Jesus ĩ mutũ ifar fen, to solof iron.

Baban pris mudur adom, ĩ to fiyen, “Õ Kristus, Negur Naal de?”

⁶² Jesus iron, “Aya im, ã Tamo Naal Negur megeir ado ima biyalem ibod ken, saa lalo bun isi mog, ulogouf.”

⁶³ Age ye di, pris mudur ado in kolos serek fe fen, to fen, “Ere nigin ada od megeir fiya nigin tamo baban tamirēf?”

⁶⁴ ã kono fiya od mogo karī gel. ã ere kisi gef?”

Idi ganan ĩ laa fouf nigin diron. ⁶⁵ Age de fen, tunī Jesus disisnē, mala difofakel fen, imedim dun. Age de fen, idi diron, “Aim inok kurō weis urō!” Age dife di, kusĩ tamo Jesus dale fen, dun.

Pita Jesus Nigin Wa Fen

(Matyu 26:69-75; Luk 22:56-62; Jon 18:15-18, 25-27)

⁶⁶ Pita fõ fofomalan tenebur ibod mog, pris mudur ado nē kabĩ kayau taka isin. ⁶⁷ ĩ, Pita yã imidir mog, lo fel fen, iron,

“Õg Jesus Nasaret tamal geiden.”

⁶⁸ Anī ere, ĩ waf fen, iron, “Õ od urok enī, aya keleĩ sã.” Age ye fen, ĩ bobogē iyok ilen.

⁶⁹ Kabĩ kayau anī Pita an ile fen, ĩ baban an difaren anī irokenēdin, “Tamo enī are idi neid taka.” ⁷⁰ ĩ baban wa fen.

Sain naal ilele di, idi melsã difaren anidim Pita diro-kenen, “Momoi bagai, õ idi neid taka, ere nigin, õ Galili tamal.”

⁷¹ Ì mogo yogo bouwa geluf fen, total od irokenẽdin, “Tamo ã urõgef anĩ, aya keleĩ sã.”

⁷² Age ye mog, kaisã bagai, tataro baban kokorok yen. Age fe di, Pita Jesus od irokenen anĩ weder fokõ felen: “Tataro fau kokorok ye uru fiya sã mog, õ aya nigin wa wo, towo wouf.” Anĩ bunem, ã kusureis fen, ãnã yalen.

15

Jesus Pailat Mala Bun Ifaren

(Matyu 27:1, 2, 11-26; Luk 23:1-5, 13-25; Jon 18:28-19:16)

¹ Bonimeï bagai, pris odudug, mudur adodo, lo ifelnẽdiya tamo, Juda neid kaunsel ganan geid, od difon. Idi Jesus difõ dale dirou, Pailat ima bun dinon.

² Pailat Jesus to fiyen, “Õ Juda neid king de?”

Jesus solof iron, “Are de yer, õ urok anĩ.”

³ Pris odudug ã bouwa bun od musei dun. ⁴ Anĩ nigin, Pailat baban Jesus to fiyen, “Õ to solo wo urõf de? Ereb ereb musei nigin bouwã bun od dinof anĩ ulef.”

⁵ Anĩ ere, Jesus fau od taka to solo fen. Age fe di, Pailat terẽ ye fen, kisi musei yalen.

⁶ Gawaman nẽ tobonunã are, Pasa Sifa inoya bun tamo kayau dirõ di, kalabus bun tamo taka dalisnẽdig. ⁷ Tamo taka yana Barabas ã, tamo kusĩ dales fen, tamo didenkesin, kalabus bun dinenan anidi neid taka. ⁸ Tamo kayau mala odug dise, Pailat gai age fedig anĩ, age fenẽdiyof nigin to difiyen.

⁹ Pailat to fedin, “Ã aya Juda neid king anĩ aliskeneif de?” ¹⁰ Pailat keleĩ, pris odudug idi kiyeĩ dino fen, Jesus ã ima bun dinon. ¹¹ Anĩ ere, pris odudug tamo kayau waud

dale fen, dirokenēdi di, idi Jesus ban Barabas anī Pailatem yaliskēdiyof nigin diron.

¹² Pailat idi to fiyēdin, “Juda neid king gedig anī, aya ī nigin naig afiyēf?”

¹³ Idi diweig diron, “Aa tetek bun ūf!”

¹⁴ Pailat idi to fiyēdin, “Ere nigin? Ere mosor ī age fen?” Anī ere, idi totol bagai diweig diron, “Aa tetek bun ūf!”

¹⁵ Tamo kayau waud el fouf nigin, Pailat Barabas yaliskēdin. Pailat irō di, Jesus wagī difiye ken, aa tetek bun dūf nigin, kusī tamo imeid bun inon.

Kusī Tamo Jesus Ketē Difiyen

(Matyu 27:27-31; Jon 19:2, 3)

¹⁶ Kusī tamo idi, Jesus dale dirou gawaman mudur nē fō aaben dile fen, kusī tamo ganan diweignēdi di, guru difen.

¹⁷ Idi gabar kadaū difounkenen, age de fen, idi malū duri ado dale, teter tanak kori de fen, ī mudur bun kurū difen.

¹⁸ Age de fen, idi ī diweig dirokenen, “O, Juda neid king gai ibodōf!” ¹⁹ Baba baban idi werī tibog nem mudur bun du ken, disisnen. Idi iboreid bobou de, kususu de fen, ketē difiye. ²⁰ Idi ketē difiye kel fen, gabar kadaū dinukeis, yogon gabar bagai anī difounkenen. Age de fen, idi ī aa tetek bun dūf nigin dirou diselen.

Jesus Aa Tetek Bun Dun

(Matyu 27:32-44; Luk 23:26-43; Jon 19:17-27)

²¹ Tamo taka Sairini tamal, yana Simon, Aleksanda Rufus ado neid temeid, ī yogon fonom isi, luwen wal fediyōū mog, idi Jesus nē aa tetek faali fouf nigin nugo difiye. ²² Idi Jesus modoū yana Golgota (anī nē gariya, Mudur Tuwa nē Modoū) an dirou diselen. ²³ Age de fen, idi Jesus darau naal to karī youf nigin wain marasin* taka ado falei de difenen, anī ere, ī to yon. ²⁴ Idi ī aa tetek bun

* **15:23:** Marasin nē yana, ‘mer (myrrh).’

du ken, in gabar foi de fen, aibem erēb anī yalouf nigin aisāi kodē den.

²⁵ Bonimeī nain kilok bun, idi ī aa tetek bun dun. ²⁶ Jesus bouwa yūya od eig de ditoton: JUDA NEID KING. ²⁷ Idi bē tamo urug, ī geid aa tetek bun didenen, taka Jesus ima biyalē, taka ima kilē.† ²⁹ Tamo kayau dile disi dife, kono difiye ken, kasā difiyē, mudureid dira ken, diron, “Ō, tempel narī afel fen, baban naa towo bun anouf, won, ³⁰ ō ogo nigin usenne ken, aa tetek bun tamal kutū weis!”

³¹ Age difiyen gen, pris odudug, lo ifelnēdiya tamo geid, idi dogo dogol wogō de fen, ī ketē difiyen. Idi diron, “Ī tunī isennēdidig, anī ere, ī yogo isennēya kisi feleya sāl ³² Kristus enī, Israel neid King, utornēg len, gama aa tetek bun tamal kutū yeis len, tail fen, momoi tauf.” Idi ī geid aa tetek bun didenēdineg, ī kono difiyen.

Jesus Laa Fen

(*Matyu 27:45-56; Luk 23:44-49; Jon 19:28-30*)

³³ Gaa atun tuwelf kilok bun, gugum isi, teneub ganān kerū fel ile, tri kilok aragaun. ³⁴ Aragau tri kilok bun, Jesus wade bagai iweig iron, “Eloi, Eloi, lama sabaktani?” –ani nē gariya, “Neu Negur, neu Negur, ere nigin ō aya utornal?”‡

³⁵ Tunī melsā difaren, anī karī de fen, idi diron, “Karīg, ī Eliya iweignek.”

³⁶ Tamo taka gudu re ile, spons[§] yalen, wain makik ado bun nu feis fen, tibog bun ino fen, Jesus yāf nigin ifenen. Agef fen, ī iron, “Gama utornēg. Eliya isi yaleisnē mog, tailauf.”

† 15:27: Itotoya tunī eig de ditoton: kilē. 28 Age de fen, Negur nē Itotoya enei kisi felen, “Ī lo difodulēdig anidi geid bagu difedin.” (Asaia 53:12) ‡ 15:34: Sam 22:1 § 15:36: Maaīwō tamal safina taka, ku nanaal musei ado naan dū fedig.

³⁷ Jesus ait odug nem iweig fen, laa fen.

³⁸ Tempel nē gabar faraf uru fen, ilunenem irousil teneburen. ³⁹ Kusī tamo neid orowa, Jesus wagen an ifaren anī, in kaīya anī karī ye, in laa anī ile fen, iron, “Momoi bagai, tamo enī Negur Naal!”

⁴⁰ Kayau tunī so del difar fen, lo difen. Idi atun, Maria Magdala, taka Maria, Jems naal bagai Joses ado neid sineid, taka Salome. ⁴¹ Galili an kayau enidi Jesus dō difiye ken, aruna dalen. Kayau musei, Jesus geid Jerusalem diselen anidig an difaren.

Jesus Mū Difen

(Matyu 27:57-61; Luk 23:50-56; Jon 19:38-42)

⁴² Naa are dodok fiya nē naa (naa anī bure fele di, Sabat naa wō youf). Aragau mog, ⁴³ Josef, Arimatea tamal, ī kaunsel neid odug taka, ī yogo anī Negur nē tano tari fen, ī kumī sã Pailat garan ile, Jesus bouwa buru yalouf nigin to fiyen. ⁴⁴ Pailat Jesus mogo laa fel ya anī karī ye fen, terē yen. Ī kusī tamo neid orowa iweigne ken, Jesus mogo be laa fel anī, ī to fiyen. ⁴⁵ Sain ī kusī tamo neid orowa bun laa fel ya karī ye fen, ī Jesus bouwa buru yaleya nigin Josef yo fiyen. ⁴⁶ Age fe di, Josef gabar lalau na yale fen, bouwa buru yaleis, gabar lalau anim sile fen. Agef fen, ī matmat sa bun ku dalen anī kur inenen. Gama ī meein wele fe di, matmat bobog katī felen. ⁴⁷ Maria Magdala, Maria Joses nē sina ado, ī dinenen modoũ anī dilen.

16

Jesus Mata Kel Fã Yen

(Matyu 28:1-8; Luk 24:1-12; Jon 20:1-10)

¹ Sabat naa bure fele di, Maria Magdala, Maria Jems sina, Salome anidim dile, Jesus bouwa bun wã difouf nigin,

moul sumeĩ biya na gei difen. ² Uub nē naa matu bun* bonimeĩ bagai, we kurã fel mog, idi matmat bun naab diyok dile fen, ³ idi abob to difen, “Aim matmat bobog bun meein wele fel kanadauf?”

⁴ Age de fen, meleid diran, idi meein odug biya anĩ wele feleya dilen. ⁵ Idi meku namen dilen, tamo gaũ taka gabar lalau ifounkel, ima biya melem ibod mog, dile fen, terē den.

⁶ Ĩ iron, “To terē wog, ã Jesus Nasaret tamal aa tetek bun dun anĩ umirnēgef. Ĩ mogo fã yel! Ĩ ein sã. Idi ĩ dinenē yenen modoũ anĩ uleg. ⁷ Anĩ ere, uleg, in dõ fiya tar Pita geid urokenēdig, ‘Ĩ ketem Galili ilef. An ĩ ulogouf, ĩ irokenein kilei.’ ”

⁸ Idi terē de fen, waud firagagaũ felen, anĩ nigin, kayau idi ulolõ deis, meku ditor diyawon. Idi kumĩ den nigin, aib taka to dirokenen.

[Itotoya tunĩ kulu bagai od gariya dino fen, ditoton anĩ bun, Mak 16:9-20 to ibodok.]

Jesus Maria Magdala Bun Wõ Yen

(Matyu 28:9, 10; Jon 20:11-18)

⁹ Jesus, uub nē naa matu bun bonimeĩ bagai, fã ye fen, ĩ Maria Magdala bun ketem wõ yen, kulu Jesus kaa sesen sewen kayau anĩ bun irudin. ¹⁰ Ĩ ile, idi Jesus geid diyon anidi, waud gudũf fen, marudim difen anĩ irokenēdin. ¹¹ Idi, Jesus mata fã yel, kayau ĩ ilel ya anĩ karĩ de fen, waud to momoi den.

¹² Dum in dõ fiya tar uru naab diyok dile mog, Jesus bouwa fire bunem, idi atun wõ yen. ¹³ Age fe di, idi keku de disi, an difaren anidi dirokenēdin, anĩ ere, idi nigineg to momoi den.

* **16:2:** Are Sande.

¹⁴ Dum idi llewen, saaf doko dibod mog, Jesus idi bun wõ ye fen, ou fiyẽdin, ere nigin, idi Jesus fã yel mog, dilen anĩ to momoi de fen, waud katĩ difelen nigin.

¹⁵ Jesus irokenẽdin, “Ã teneub ganan bun uleg fen, biya od tamo kayau ganan urokenẽdig. ¹⁶ Taka ã momoi ye fen, naan yalef are, ã kel yalouf, taka ã to momoi yef are, es fiya bun inenẽf. ¹⁷ Momoi def idi, uris enidi idi bun wõ youf, idi aya yanau nem kaa sesen dirudiyouf, idi od mata mata wogõ douf. ¹⁸ Idi imedim gogour dale diroudiyouf, takag, laa nẽ mũ sane dãf, to mũ idenẽdiyof, takag, idi dagi tamo bun imeid dino di, dagi sa kalauf.”

Jesus Saa Ilun Irou Iselen

(Luk 24:50-53; Aposel 1:9-11)

¹⁹ Odug Jesus irokeneĩd bure fele di, Negur Jesus yale, saa ilun irou isel, Negur ima biyalẽ ibodok. ²⁰ Anĩ nigin, in dõ fiya tar dile, teneub ganan bun biya od wogõ den. Age dife di, Odug idi ado kabĩ yale di, uris bunem yogon od anĩ megeir fen.

Mata Ifenēya Nē Od
The New Testament in the Marik Language of Papua New Guinea
Nupela Testamen long tokples Marik

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

The New Testament

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

PDF generated using Haiola and XeLaTeX on 19 Oct 2021 from source files dated 20 May 2021

d7099f9d-3bdf-5620-8eb3-7e6c51cab7ea